

卷之二



匏翁家藏集卷第二十

詩五十首

與周公載運使會飲追和往歲所寄述懷韻

京邸當年客馬周如公相見未輸籌登名早為唐科喜流涕長  
懷漢室憂煮海功多成國計肆筵情重雜時羞只今公道知猶  
在幸值明時豈陟幽

揚補之竹枝

補之舊擅梅花手忽向人間見竹枝數葉條然書法在此中惟  
許晉人知

讀濟之南都紀行詩

長卷親書截剡藤調高欲和却難能燈檠夜靜頻生地硯涖冬  
深始結冰舟入龍潭輕一葉屐回龜嶺歷千層句中了了江南



意為憶登臨我亦曾

身亦曾謁元世祖廟

百年中國乘衰運萬馬臨河度幹難魯史會戎猶甚謹燕都稱

帝亦偏安冠裳已敝塵埃積俎豆雖陳棟宇殘零落御容茅屋

底居民只作羯胡看

送林世調赴湖廣參政

已愛超遷愜所推不知清議尚嫌遲省中公事方多日席上同

年漸少時西控早成持檄夢世調先夢持檄有西控巴蜀之語南行兼慰倚門

思春來舍館渾如舊荀氏于今更有慈弟世南祠祭員外郎

元夕雪

已愁冬煖欲聞雷雪落燕山幸此回陰滿同雲連紫禁色欺明

月映羅臺六花總向早春放一尺不須平地堆況值元宵好風

景萬家歡賞共傳杯

十六夜邀仲山濟之禹疇飲

雪月交輝歎未曾寒生硯沼見春冰年將六十應推我地比西

南已得朋坐久市燈無一盞飲殘官酒只三升山陰回棹真堪

笑此夜分明興可乘

送陸全卿巡按福建

豸角冠高近赤墀身依霄漢立多時天威瞻仰承新命王事

咨詢訊載馳人好不憂風裁少地偏難使德音違行行却與吳

門便繡服登堂奉壽卮

錢舜舉仇書圖

斑衣繡袴紅錦繡眼中嬉戲皆兒曹三兒仆地地着尻紛紜扼

吭力與塵風旗破偃失所操篋笥所有藏不牢一兒傍睨髮兩



髦獨抱書卷不忍拋就中此子差獨高雪川老錢真畫史意匠  
經營妙如此嗟哉幼而不孫弟閱墻之事從茲起請師教兒讀  
曲禮

送姜恒頰改守寧波便養

漢書舊說河南守未許吳公美獨專奏疏屢陳容便養官階無  
改勝喬遷地連越嶠仍持檄家在婁江好放船從此升堂了公  
事夜筵春酒樂高年

廷試東閣閱卷

紫雲垂戶結春陰坐接群公奉玉音薄識未勝甄別事長才俱  
罄對揚心大官供給珍羞滿常侍奔趨禁闥深漢代賢良遺制  
在披沙應喜得兼金

赤壁圖

西飛孤鶴記何祥有客吹簫楊世昌當日賦成誰與註數行石

刻舊曾藏

世昌綿竹道士與東坡同游赤壁賦所謂客有吹洞簫者其人也

趙松雪蘭竹圖

鷗波亭上春風筆秀色倏然共一丘頭白江南真想見幽蘭叢  
竹帶桑洲

送吳禹疇赴廣東兵備副使

辭朝初下大明宮臬事都歸玉敕中繡服遠巡兵衛繞戈船閒  
泊島夷通天常作雨連重嶺海不揚波少颶風却羨宦游親友  
在公餘應喜一尊同

時仲山初擢廣省

送施克寬太僕守思州府

十載周家有僕臣喜承新命駕朱輪豈無輔郡勞賢者須信宸  
衷念遠人山下行春緣草樹天中入夜望星辰煩君莫改巴陵



政遺愛今猶在楚民

文湖州叢竹圖

湖州去世六百年尚畱細竹翠娟娟縱橫散亂如蓬賤豈是坡  
僊詠漢川兩岸脩影何處見石罅百折流清泉泉鳴竹響合虛  
籟我欲拄杖聽泠然

送仲山赴廣東參政

久從夏官卿分署專典選莫府累上功鑒別殊不倦吏胥服精  
疆寮案推老練以茲績屢書有最却無殿屬當黜幽時諸省多  
獲譴山公重人才啓事遂登薦御批由論定豈藉氣力援參政  
三品官後世號方面坐鎮惟大藩宣化及州縣孰云嶺海遙炎  
蒸少霜霰民物誇繁雄此地今甚善米粟出要荒賦入同禹甸  
公田況早收積蓄總饒羨已不煩催科況乃免鞠讞中年始入

廣身已脫俗諺鯨波就再涉浮海亦乘傳章服耀金緋真不忝  
恩眷公餘適清暇發篋得詩研山川有諸奇題詠語頃徧此行  
信堪喜更喜過家便十載別吳門親友幸相見衣錦當書行  
璽書因爭眩行哉不可緩我獨重戀戀平生託心知故舊莫予  
先都下常合并秋社異鴻燕時枉過園居辨折啓文卷海月故  
延畱盤蔬雜藜苒往往入夜還行歌共群彥孤懷今何如誰復  
容鄙狷久旱得微雨南風特狂煽城東大道傍樹暗時節變嚶  
嚶求友聲黃鳥聽百轉臨別心惘然舉酒未能餞

癸丑閏五月十四五日久旱大熱十七日得雨始解偶  
閱王荆公集首卷見二詩頗合乃次韻以寄濟之

氣候殊非常地不限南北不知人間世何地獨清寂炎風晚逼  
人背坐時屏息遙思凌陰居須用冷淘食清晨頭未梳終夜汗



猶拭歐公賦病暑徧誦句難摘

好風從東來長夏適吾適故人不相逢豈謂一墻隔向來旱太甚土燥憂地坼暑氣何可當對案曾廢食一雨洗焯煩人情俱有獲夕陽寫脩篁庭際開畫壁披襟納涼思虛館聊憇息積水溢清池疎髭照能白

連雨再次前韻寄濟之

脩篁在池南朱藤在池北置我于其間翛然轉幽寂雨絲密復疎其勢當未息農家寧米賤安坐得飽食再和彎碕篇端溪已新拭泚筆何處書圓荷手親摘

青林鬱然深東望懷小適

濟之園名

冒雨定不來共月却相隔危亭

昔再成池涸岸如坼何況舊井泥莫汲寒泉食安知庚伏天乃有此厚獲水流聲滿池屋漏痕在壁朝回無一事僮僕猶偃息

葦間瑩然明老鶴羽偏白

倪雲林秋林野興圖

經鉏堂前木犀黃何人晏坐問天香迂翁胸中有清癖欲摘繁花歸枕囊秋林野興圖親寫百年零落燕都下市門不遇杜長垣殘墨誰將手重把

次韻為王應爵進士題天平山石湖二圖

萬石如林貌得真縱橫碧潤共蒼岫城中拄笏須閒客林下峨冠有正人支老鄰居馳駿馬范家先墓倚危巖峴山未必高如許遺愛當思繼晉臣

時應爵初除上高令

古亭石刻手曾摸宋墨當年記石湖絕澗百盤橫略約晴波九級蕩浮圖開園種樹山為界放水灌田天賜租重擬四時編雜興范家莫認是堯夫



送張叔亨出巡雲南

曉承天語五雲低，真覺香煙滿袖攜。  
南詔遠人勞按治，北畿多士憶提撕。  
久看桓典乘驄馬，未信王褒祀碧雞。  
應過滇池詩興滿，不妨揮筆製新題。

送朱堯民

連雨起涼颼，新秋迎溽暑。匆匆即言旋，晚共園亭語。  
泥淖一尺深，驢車在郊墅。路人勿相疑，不是從選舉。

送陳宗理知永定

為愛君家世，先朝有直臣。急除官未晚，小試縣猶新。  
地遠能馳譽，才長却稱身。熙然山谷底，騎馬徧行春。

早朝

晨雞初唱攬衣裳，城闕遙分見曙光。  
耿耿長庚帶殘月，迢迢行潦接汗潢。  
橋頭雨過添新水，蘋末風來送早涼。  
自笑江南未歸客，廿年騎馬入朝忙。

送戴師文參政

雄藩瞰南海，富庶冠諸州。稽古建方伯，參佐須名流。  
戴君本台產，早為賢科收。兵曹善裁決，可與姚崇儔。  
況乃飭文墨，士林名不浮。冢宰始高薦，夏官難固畱。  
惜哉重末務，無能為國謀。邊徼偶多事，方勞九重憂。  
玉關度羽檄，未解小邦仇。又聞古靈武，胡馬滿山頭。  
兵技彼或短，將材此誰優。山川有險易，地利更當求。  
坐見萬里外，須煩人運籌。幸君年尚富，仕路廣且脩。  
朝廷愛人才，巖穴猶當搜。有才如君者，豈置南海陬。  
暫去勿復顧，蠻方候回輶。

郭熙雪浦待渡圖



宋人能畫非等閒郭熙絕藝如荆關御府收藏三十軸玉堂猶  
自遺春山橫圖若此纔數尺春山相逢應厚顏北風怒號振平  
野巖石吹墮林柯鬱望中慘慘皆雪意飛鳥未倦爭飛還何人  
剪水作六出山上陡失千青鬢渺然上下同一白但見空林楓  
葉散流泉不流凍作滴豈似雨過聽潺湲群猿入洞失連臂文  
豹藏窟無一斑須臾坑谷盡填滿萬頃蕩漾仍澄灣野航載客  
遙在望舉手招呼急欲扳冰花粘棹行尤澁雲低落日懸孤環  
往來浦口屢涉險未識舟人心孔艱擁裘馬上莫相笑山南捷  
徑非人寰

### 范寬雪山圖

華原范生性落魄太嶽終南雙草屨酒酣握筆發天真無奈胸  
中飽丘壑開門仰望青嵯峨誰遣紛紛雪花落前峰後嶺失

嶒何處移來千玉璞良工袖手琢不能此語分明非善謔長溪  
一夜冰梁成山足潺潺垂短瀑風回木落罔巒空遙向林端見  
高閣興來便欲扶筇行去倚危闌招獨鶴人間此景却輸吾寒  
士多年甘寂寞

### 趙大年春江圖

密林蔽日青蒙茸兩岸都歸煙霧中分明畫盡溪頭景只欠垂  
綸一釣翁釣翁莫放扁舟去沙上鴛鴦方好睡落盡槌花人不  
知夜來細雨春流賦

### 楊補之雪梅圖

竹外斜枝凍雪乾楊翁風度亦酸寒扁舟穩繫吳山麓須向石  
湖深處看

### 王澹游歲寒圖

後有王叔明跋



脩竹風回玉珮清松聲相和紫鸞笙北人不識梅兄面莫怪王  
蒙說手生

錢舜舉水僊花

種盡芳根花不發雪翁筆底忽生妍人云須向水邊種始悟花  
名是水僊

次韻題畫

木葉下回溪依然見山影高人為尋詩不畏溪頭冷日落雲初  
還鳥鳴林更靜占此一壑居人生非不幸

謝吳承翰送悟道泉有序

成化己亥春予偕李大僕貞伯游東洞庭山宿吳鳴  
翰宅明日偕過翠峰寺寺有悟道泉飲之甘美相與  
題詩而去今二十一年矣一日鳴翰弟承翰使人昇巨

甕以泉見餉予嘉其意以詩謝之於是太僕公與鳴

翰皆物故矣

試茶憶在廿年前碧瓏甕來味宛然踏雪故穿東澗屐迎風遙  
附太湖船題詩寥落憐諸友悟道分明見老禪自愧無能為水  
記徧將名品與人傳

姪奕勺泉烹茶風味甚勝

碧甕泉清初入夜銅爐火煖自生春占區舟楫來何遠陽羨旗  
槍淪更新妙理勿傳醒酒客佳名誰與坐禪人洛陽城裏多車  
馬却笑盧仝半飲塵

東坡樂水圖

右手按膝左手戟長帽不着豪氣溢此公豈是尋常人眉山秀  
出文章伯擘開青峽噴玉泉石罅百折猶轟然山中自當一部



樂何用嘈嘈鳴管絃惠州飯飽渾無事羅浮之西山崛起白水  
雷題屬此公萬里來游天所使黃衣條然戴小冠水樂同為杜  
牧看圖中不是程正輔方外當為鄧守安

元人陳惟寅有蘇杭懷古詩各六首予以杭未至而蘇  
事甚多總和六首

自古繁雄地駕言游且行載瞻至德廟容象宛如生曰塘入古  
詠一水仍前橫

胥山高百尺勢抵越王臺越今在何許溪名猶越來當時艱與  
種齒骨亦浮埃

五噫歌不作葬近要離墓耕夫戒揮鉏忍使墓碑露更念臯伯  
通徘徊不成步

壯哉重瞳子叱咤人如無子弟八千人渡江惟一呼英姿不復

返吳門空夕蕪

南昌有一尉官卑同抱關獻書論時事能動天子顏市門卒何  
賤高風香難攀

王珣開別墅林石冠吳都安知歌舞地梵唄託浮屠居民祠短  
簿櫻肉多神烏

沈石田追倣黃大癡長卷為林御史舜舉題

大癡道人顧長康平生癡絕仍畫絕長卷當年我亦觀大畧猶  
能為人說山川歷歷百里開彷彿扁舟適吳越平林曲岸客共  
游複嶂重湖天所設漁工樵子互出沒定有高人在巖穴墨瀋  
淋漓拾未能信得畫家山水訣為人說此亦徒然把筆安能指  
下傳對本臨模未為苦運思想象誰能專晴窗設色手自改輸  
與吾鄉沈石田



次韻韓彥哲州倅促予作生墓志

面辭天闕向南歸，落落晨星故友稀。人比荊州今即是，年過蘧  
瑗尚知非。舊施美政，爭傳播，預恐蕪詞少發揮。表聖達生真不  
忝，壽瑩石表，定生輝。

為奎姪題石田雪景

瑤林依石斷雲攢，雪後西山更好看。憶向越來溪上過，梅灣玉  
削數峯寒。

次韻石田七十自壽

壽數長期百歲零，試看把卷眼明星。未誇共仰人如斗，尚憶初  
生歲在丁。宅近江湖雲際白，天寒松柏雪中青。北堂自獻長生  
酒，不愛嫦娥藥最靈。

煬帝龍舟圖

畫棟重重半空裏，殿脚誰云在平地。洛宮送載到蕪城，試看龍  
舟浮綠水。錦帆高挂起春風，恍若江神備驅使。萬歲千秋樂未  
央，左右何須奏封事。當時般鑿有陳家，親聞玉樹後庭花流連。  
豈在宴安日，荒惑昔者先萌芽。渡江伐罪豈不見，悔殺井中張  
麗華。邗溝迢迢幾百里，暮雨蕭蕭楊柳斜。惟餘尺許龍舟樣，畱  
與人間說隋煬。



匏翁家藏集卷第二十

匏翁家藏集卷第二十一

詩四十九首

西齋前作步廊三楹奕姪種紫竹數竿于前因名紫竹  
詩人自昔詠長亭匠氏何勞檢木經白板也須存古制紫筠聊  
復製新銘苔痕漸上階還登月色無邊戶不偈携向江湖風若  
利吳歌唱動便揚舲

補送艾郎中使朝鮮次韻二首

天高廣樂奏清都日近金門動玉樞當代使規應在蒙古人王  
會已成圖誦詩專對須郎署秉禮相傳自海隅東去莫論窮八  
站喜無烽火照長途

前星光動 詔頒時 賜服煌煌稱漢儀久愛姚崇裁滯事又  
看陸賈製新詞歸循山海旌垂節步上星辰履飾綦鴨綠江頭



誰擊鼓曉來相送有馮夷

題山比山朱氏所復王芻梅小畫

存復齋中此一毫楚弓亡去更誰橐摩挲故物仍三歎不為朋  
梅意匠高

題許道宣秋山暮靄圖

遠山近山翠浪傾愛此萬疊秋初晴已多浮雲巖下宿只有暮  
靄空中生草樹紛紛縱復橫風回落葉填礧坑哀猿啼處日將  
暝谷口不見樵夫行重洲複渚望不極漁舟獨出沙鷗驚三山  
二水昔人句彷彿當時登石城何如攢蹙尋丈裏一日千里當  
前呈畫家意匠勞經營墨氣濃淡皆有情平生見此真有幾不  
負長安許道宣殘山豈合堆馬遠寒林亦宜矜李成世間神品  
吾所遇沈老舊藏高克明一圖作配實相稱品格豈待宣和評

嗚呼人言名畫真是名一笑頓覺千金輕

過先坐登南橫山絕頂時表弟吳子高姪奎奕兒子頤  
負侍行

南山翠色與雲齊萬級登登石作梯水入太湖縈白練樹依重  
嶺簇青藜雖鳴麥壠聞田雉角解松林遇野麕日暮載瞻瑩城  
近 恩光新沐首頻低

文宗儒蓄匏研借觀數日宗儒以其制與拙號合遂以  
贈予研額刻元豐二年及晉齋學士四字印文曰李洞  
身垂苦葉入秋肥紮玉分明滿一圍遺物未亡殘墨少舊銘猶  
在昔人非固辭莫怪還終受久假安知遂不歸應念老夫同氣  
味百年文苑幸相依

聞啓南有匏研更古次前韻



平生端為飲泉肥几格惟憂筆陣圍忽見銘文真偶合向來形  
製却全非空囊得爾復何望文苑微斯誰與歸莫道我心猶可  
轉石田有石樣還依

題啓南寫緋桃圖卷首題石翁樂事四字桃作六出有  
議其誤者予因解之

石翁樂事嗟何事終日春風繞筆吹寄語看花人仔細緋桃干  
葉半開時

題元人任本立墨竹追次虞邵菴韻

籊籊猗猗竦而立豈讀衛風名始識條將長身記水墨放曠似  
嫌依六逸臨風首肯對以臆謂我此言人莫敵歲寒雅操從少  
習玉版禪機尤秘密毛髮蕭蕭垂紺碧湘江新沐如膏濕鷓鴣  
日暮啼且集任公東海登釣石高竿未斫礙雲日運思正慰王  
猷憶深林冥冥煙雨滴風動仍聽無孔笛湖州已遠休物色薊  
丘無復齋名息百年筆法尚能傳篋中喜為鄒陽得

西溪舟行二首

溪上扁舟隔月來農家風景稻齊栽石湖正接鮎魚口芳草又  
生麋鹿臺越國深謀當日得吳宮遺曲後人哀每當懷古傷幽  
抱日落靈巖首更回

清曉農家始荷蓑一篙初試水痕多亂山遮斷疑無路長岸回  
旋自有河休縛草龍依古法徒聞秧馬作長歌船窗欹枕初成  
夢却報荷花蕩已過

久旱得雨 五月九日

夜深涼思入衾裯一雨俄為五月秋庭下盡將甌甌覆岸頭初  
見桔槔收謾添城市兒童喜深慰山鄉父老憂擬效石湖編雜



興閒居豈獨為身謀

五月十三俗云竹醉日種竹叢桂堂前時舊竹俱亡醫俗亭亦撤去擬別構數椽名之曰復竹

東園不見綠紛紛二十餘年別此君健僕荷鋤乘醉日老夫攜枕欲眠雲遠支散處憐無恙舊記猶存愧不文擬向牆陰結低屋楣間題字是云云

晚晴

浮雲自解散空中無所依草樹總欣悅沃若生光輝螻蛄似相語鶉鳩忽低飛虛庭亦何有新綠生苔衣倦來聊自釋柔翰初停揮細詠柳州句千載人已非慨慕至終夕世豈惟陶韋

夜坐

伐磬一何促擊柝一何遲夜景坐來寂流螢自參差片月不常照浮雲相蔽虧葛襟滿涼氣伏暑無炎曦坐來欲歛席微雨猶絲絲良夜豈不愛耿耿如有思出處有道在行止非人為惟應乞身後終年守茅茨

西山雜興七首

效范文穆公

岸頭偶遇種瓜翁為說瓜田可免窮瓜到熟時錢易得只愁螢火作蝗虫

橫山西麓見山農為說山田最害儂一畝猶輸糧七斗何曾囤裏蓄冬春

小戶無田糧最慳從來戶內只荒山一升舊額加三四割盡茅柴難補還

老農頭白種山田不識山中有蕨拳苗可作殖根作粉何為忍  
餓度荒年



手持長鍾背攜筐日出深山斲藥忙不為延年資服食賣錢買  
米納官糧

海上風來偃綠楊城中人喜夜乘涼不知農父芸苗處只愛田  
間水似湯

雨勢如傾水滿塘旱田能救是高鄉明朝還用晴乾好恐使低  
鄉告水荒

叢桂堂前看月有感 七月十四夜

廣庭新斲石巖巖偏與秋來看月宜涼氣故延今夜坐清光不  
負古人詞小山叢桂含香待流水清蘋逐步移來歲未知誰在  
此西家長笛莫教吹

後夜無月

月向圓時正好看浮雲入暮故漫漫陰晴明日真難料用舍平

生只自安天上無人凌倒景海東何處溢清寒虛簷不礙長松  
樹獨坐胡牀到夜闌

為盛舜臣題山水長卷

城西蕩雙槳遙背伍胥門人家枕河住漸喜歷鄉村豁然見平  
田農夫荷鋤去好風低嫩苗微雨灑高樹葦間多放艇柳下或  
扳罾錦布芰荷蕩沙明鷗鷺汀魚梁接牛宮沽酒新郭市迤邐  
到橫塘虹橋垂四趾亂山似遮路旋轉自長溪水入太湖北雲  
生光福西扣舷唱吳歌有客中流過千載懷古心悠然欲相和  
香徑既云沒琴臺亦成空山頭明月上仍照館娃宮登高信徒  
勞望遠發深喟開展圖書看舊游一何類

次韻石田戲朱野航短視

石翁目如炬下見淵魚沉么麼蠅頭字夜讀成書淫作詩調朱



子譬如火爍金又如白日中光燭孤雲陰其詩信善謔當於古  
人尋嗟彼盲者病遇人惟聽音其病最所苦畫地不及瘖雖然  
苦若此樂師能鼓琴朱子却差勝矐子職自任使見素服者何  
曾謂青衿惟恐醉生花酒至戒滿斟砭砭手所抄書卷徧詞林  
平生臨池興墨氣識淺深時復瞑焉坐雅思發孤吟要知視短  
者反視惟求心

叢桂堂前五詠

梅

冰雪難為厄多緣虫所傷園丁莫醫治試檢郭駝方敗葉頻飄  
砌彎柯強出牆誰嫌花寂歷還解吐寒香

栢

細數先人植依稀六十年狂風莫能拔撐壁尚危然日午影猶

側霜多皮更堅平生藉依倚巨石幸相連

椶

櫟社異茲種如何身類之奇形豈天賦割剝諒非時磔磔還同  
瘦扶疎不是痿猶能為拂子敢負少陵詩

藤

牆傾何須附尺地幸相容但惜渠何罪髡為城旦春纏根維石  
固食葉有虫攻叩首疑飛躍乘雲欲化龍

竹

委巷名脩竹胡為不稱名空庭秋月落短影愧詩評嫋娜因風  
舞蹒跚着地行仰看松百尺能結歲寒盟

謝石田送匏硯復次前韻

園官驚見瓠壺肥肯信良工自範圍物在要論真與假譜亡空



較是耶非出門合轍何從合迤墨歸儒始是歸不是癡翁多玩  
好平生有號更誰依

中秋後二夜獨坐

不須把酒問青天秋色平分恨稍偏已覺初昏星漸密難教既  
望月長圓詩中蟋蟀依牀下江上芙蓉到檻前更有桂花香可  
挹垂堂獨坐未成眠

題湯溪胡氏藏朱澤民山水大幅

晴雲亂落長澗疊嶂秀依密林水樂鏗然自作茅堂可徹鳴琴

顧天錫參政以公事畢過吳中省墓復還南陽送別

北來一月逐賓鴻秋水方舟有便風獨戀松楸忘道遠徧觀禾  
黍樂年豐身強肯惜驅馳力地重當論保障功山藪通民知在  
念相逢吳下恨匆匆

題王浚之茗醉廬

昔聞爾祖王無功曾向醉鄉終日醉醉鄉茫茫不可尋後世惟  
傳醉鄉記君今復作醉鄉游醉處雖同游處異此間亦自有無  
何依舊幕天而席地聊將十椀解宿醒飲中別得真三昧茅廬  
睡起紅日高書信先回孟諫議陸羽盧仝接蹟來仍請又新論  
水味不從衛武歌抑詩初筵客散多威儀無功先生安得知醉  
鄉從來分兩岐

歎雨中桂樹

幽香發叢桂秋半以為期今年節序早怪爾獨開遲開遲不須  
較終然亦遲萎及此正開際金粟仍纍纍倚樹日頻嗅折枝戒  
童兒夜來風雨作每旦無晴曦繁花總狼籍衆葉共紛披此猶  
坎壈人發達值年衰一朝不自意憂患復干之植物尚如此人



生安足悲

重陽前連雨續潘邠老詩四首

滿城風雨近重陽景物蕭然嬾下堂門外催租教且去籬邊送酒喚誰嘗人期稔歲禾俱偃俗愛佳名菊未黃無限悲秋莫能記強將詩句續潘郎

滿城風雨近重陽桂樹叢深闕小堂掃地焚香聊復爾升階拜石亦何嘗壁間着色新苔綠庭下無聲敗葉黃莫把茱萸還徧插老年衰鬢似馮郎

滿城風雨近重陽錄事年來築草堂宴坐謾將茶餅閱清齋惟許菜羹嘗浮空到處雲頭黑射地何時日脚黃溪上得魚驚水長扁舟蓑笠見漁郎

滿城風雨近重陽秋水浮渠綠繞堂書為貧看偏易忘藥緣常飲不須嘗樓高正愛遙岑碧牆短先驚古樹黃坐念昔人真自愧楊雄三世尚為郎

雨止後復續邠老句二首

滿城風雨近重陽何處歡聲忽闕堂酒擊宿醅猶強飲飯炊新米定爭嘗步臨積水驚垂白坐傍明窗寫硬黃老倦不能親句讀教兒安得作賢郎

滿城風雨近重陽倏見斜曛晚入堂病有客來難答拜食無君賜孰先嘗籠收鴨脚纍纍白盤飮駝蹄濺濺黃一任西鄰還撲棗杜詩不用贈吳郎

趙松雪秋江待渡臨本

蘋末風生江水響野航載客時來往白雲故映丹楓明秋色滿前誰獨賞江頭待渡心不忙日落高人猶偃仰負薪只恐到家



遲隔岸樵夫豈吾黨妙句窮搜入杳冥詩成似作推敲狀此圖  
舊出松雪翁百年模寫將無同紛紛真贗何足論堂上依然攢  
數峰

南唐王齊翰剔耳圖

後有東坡跋語載王晉卿耳聾事

綵毫細染王良史玉手親收黃保儀剔耳不妨閒釋卷撫髭全  
勝苦尋詩危言自足驚都尉善戲何須及帝姬寫入志林傳後  
代眉山此段事尤奇

文宗儒以重九獨飲用東坡古來四事巧相違之句續

成一詩見示偶夜過宗儒北莊乘月而歸因次韻以復  
古來四事巧相違近擬田家置短扉學圃敢誇今日是開尊未  
覺老年非岸頭軋軋挑禾去樹裏熒熒乞火歸明月滿窗仍列  
岫主人堪比謝玄暉

為史太守題畫

青山岩堯環洛下洛人盡是看山者史侯早作甲科人只踏京  
塵跨驄馬昨分符竹到蘇州夙夜常懷民社憂吳山西望亦不  
俗日坐黃堂無暇游是誰寫入丈縑裏白雲移來露其趾喬林  
深處着茅廬黃髮高人多壽社惟昔鄉人白樂天當時游賞亦  
稱賢請侯暫輟一日事却按畫圖還泛船

謝王惟顯贈雕漆柱杖

良工雕刻幾時成入手鏗然忽有聲海鶴蛻來蒼骨露壑蛇蟄  
起紫皮明江心栳竹空勞訕階下藜科浪得名雅意扶衰真不  
薄欲將文本作函盛







刻道園詩

趙松雪溪山秋霽圖臨本為奎姪題

碧山爭秀掃蛾眉故着丹楓點染之松雪齋中人不見後人猶解學王維

挑鼻圖

昨見剔耳人今見挑鼻者莫言人道我有嚏我自打

春溪聚禽圖

春溪遠發春山中一夜好雨溪流通綠波泛漲渺無際但見桃花千樹紅鴛鴦鷓鴣何容與散亂中流錦為羽倉庚獨似避游人去踏花枝落紅雨草深哺子芳洲晴葉暗仍聞求友聲展圖便有會心處放棹欲作春溪行玄裳縞衣彼何者為戀高松倚平野莫論鴻鵠志安知名字俱標在埤雅

題陳季昭畫

金昌亭側舊樓居索畫人來坐不虛誰信高年筆猶健案頭臨畫似臨書

題范文正公書伯夷頌後

鄉先正范魏公楷書韓子伯夷頌宋元以來題詠甚多然奸檜亦廁其間有韓范不時有此心誰與論之句是可笑也寬舊觀此卷今再從公裔孫從規借觀焚香再拜謹題其後

西望天平萬石林凜然生氣到于今名文有託幽光顯餘事能傳楷法深義士若微真接蹟名臣雖有莫論心歲寒堂裏千年物敢作尋常翰墨臨

題西閭吳子潤製刻絲壽圖



機中織錦慚秦娥唐宮刺繡如拙何綵絲日暖臨窗搓新藝試  
看投金梭剡雲割霧補銀河旁人不識以手摩非紵非綺  
羅但見空明搖玉波上有雙桐交碧柯下有靈草連綠莎奇石  
屹立仍嵯峨僊人曳杖顏微酡幅巾翛然步平坡高躋壽域髮  
未皤丹青朱粉費調和畫家自來無此科裁成萊衣舞婆娑羔  
皮豈少絨與紵吳中妙手不可磨樹間有字知為他五色文縑  
一尺玻清曉持向高門過海鄉樂事新年多試呼家童歌此歌

陸天游畫

翛然掩陋室幸此絕塵鞅偶開水墨圖頗慰山林想危岑瞰深  
碧湖水平於掌喬木四五株秋氣始蕭爽不逢弄舟人似聽伐  
木響二老足高致多暇自來往落照變巖姿臨流更欣賞

貞大癡畫

疊嶂帶微雲清溪落高樹茅屋是誰營緣知最佳處城中無二  
廛門外有雙屨不盡此圖情癡翁更題句

杜東原畫

曾過杜老宅不見舊林亭此日看圖畫多年失典刑古藤垂地  
紫弱柳映門青彷彿當時意吾衰鬢已星

任月山七馬飲飼圖

一馬初飲泉三馬共嚙草二馬欲飲一未嚙七馬繫維俱擡足  
圉人飲飼亦良苦莖草汲泉須美好驅馳正用千里力不使爾  
渴使爾飽爾如無用却徒然天閑肥馬雲錦連

登故友史西村小雅堂

路繞黃家溪水長春風灑淚復登堂草荒求仲常來徑塵滿元  
龍舊臥林分手死生嗟契闊傷心聚散覺淒涼高丘數尺棲神



地碧樹爭凋不待霜

訪啓南舟中望虞山憶與啓南同游今二十年矣

蜿蜒平野臥青山相見令人獨厚顏徒有詩篇曾記詠已無筋  
力再躋攀船頭旋轉憑黃帽水面低回擬翠鬢舊日同游誰在  
者欲從東老學清閒

夜宿啓南宅風雨大作

賓筵燈燭對清光更許扁舟繫岸傍衆竅盡號風在野舊痕猶  
記水侵牆草堂突兀春星暗柳市回環海浪長天意莫言能帶  
客老年難自別西莊

題啓南過吳江舊圃

吳松江腹太湖頭雌霓連蹙臥碧流我昨經行覺尤勝滿船明  
月下滄洲

過荻扁留題王葦菴宅

三十年前此地來高門重見向陽開席間香氣梅花供庭下清  
陰枯子臺春及西疇農事動晚來東浦釣船回主人爲滌胸中  
垢臨別還教進茗杯

賦葦菴新栽四栝

嘉樹初從何處移竝持高節已虬枝良材舊作荊州貢別種休  
評杜老詩杜有四  
松之說春雨總沾親手植歲寒能長及肩隨他年五  
老成賓主秀色參天映壽卮

謁外家墓

高塋昔所築遠在西山陬始鑿處士穴萬石臨上頭忽逾二十  
載旁峙復二丘左汝中  
右汝善荒涼樹盡伐蔓草自綢繆周垣旣傾缺  
中路廢誰修處士有厚德賢配信其儔如何使至此天道亦可



尤二子伯最美獨抱子女憂上冢無哭聲陳設空肴羞我獨重  
感歎淚下不可收有姪弱不振生計且無謀琢石為表識次第  
植松楸吾當任其事庶以慰諸幽

送僧無礙歸太原

出門有礙是何言萬里南游自太原總道水流還赴壑亦知葉  
落要歸根

為奎姪題吳隱之刺史遺象

南行曾是飲會泉百世清名尚卓然遺象未知還似否賦詩惟  
與後人傳

答光福張君送楊梅樹

曾乞楊家果樹栽銅坑山裏忽移來薦新每恨無佳味欲向先  
筌手自培

題陳憲副賈書圖後

過門作別意何如為說嘉禾去賈書倏過驛程輕是舫久知家  
具少於車古人糟粕猶酣甚舊日筌蹄豈棄餘莫把賈書圖也  
賣要看清節正須渠

紀游靈巖有序

靈巖為故吳宮自唐以來詩人題詠甚多而吳人歲  
必往游故范文穆公詩有不到靈巖即虎丘之句予  
少時猶見山下有石碑曰第一宮後寺既壞而山復  
遭石工之厄游者益少弘治丁巳三月予將北上與  
文宗儒輩匆匆一行時主僧久戒鑿石種松滿山予  
喜茲山之復興也賦詩紀之

載吳宮瞰瀆川重尋蹊徑意茫然青山亦有興衰日白髮空



懷少壯年巨石鑿殘憐匠斧平湖浮動愛漁船主僧手種松杉  
徧擬待成林更坐禪

紀游天池 有序

予與李世賢文宗儒諸公徧游西山晚至天池有老  
僧三人皆垂白髮數寸見客相視聘貽其一人明日  
持卷造予家索詩自言不入城者二十餘年矣憐其  
意懇既為題二絕句復賦此紀之

怪石嶮然鑿削成寺前仍有一泓清山深游客來應嬾林密居  
僧見若驚瘦骨能支猿鶴老長鬚不剃雪霜明將詩何用真堪  
惜二十餘年復入城

予以服除赴京啓南謂年老難別拏舟遠送感念故情  
以詩叙謝

行經錫谷又毘陵豈是山陰興可乘千里綠波隨客去中宵白  
髮向人增老年敢祝惟多愛厚祿深慚自不勝杖屨相從須有  
日臨岐詩券最堪憑

題無錫李舜明家藏宋王梅溪謝先世侍郎琳為主司  
啓并題御賜詩遺墨後

宋家南渡有文豪賜葬猶瞻墓柏高畱得舊時遺墨在持衡真  
喜錄英髦

宿呂城

連朝離抱不能平又記南來宿呂城酒散長亭驚雨至時同年

載酒遠送因雨始散棹依高岸識潮生麥秋未到猶三月瓜步將臨只一

程賴有故人同夜坐白頭相對燭花明

自邵伯至寶應風雨中連日過湖



滿船風雨過重湖湖上帆開百幅蒲遠岸芙蓉紛自舞中流鵝  
鶴亂相呼行期莫把前程算身計先為晚歲圖積水混茫三萬  
頃只將震澤抵中吳

入清河

扁舟離東楚始入清河行欲向水濱問如何負清名清河自南  
下黃河自東傾昔者本異派下合猶分明一從河為患散漫殊  
縱橫充豫失故道迂行過彭城迤邐數百里洶湧勢不平遂令  
清河濁敢望黃河清孰為究其故厥咎從何生清濁各歸宿巨  
海終合并河伯須率職勿俾識者驚

下邳道中見山

我行過京口青山似追餞十日浮濁流無復見山面今朝入下  
邳有物臥平行風回亂帆開山色如復見茫茫曠野間翠几誰  
所獻舟中踟躕身自覺忽輕健歐公記瑯琊蘇子訕陽羨多以  
此竝論聊慰平昔願

望桓山

郭外岡巒如大環蘇子放鶴亭記語西偏人說是桓山舟中引領猶堪  
望石上題名孰與刪予未嘗游此間有好堂制若封黃壤燥斧  
事者題予名于石痕仍帶紫苔斑孔林樹古無人伐地下知君亦厚顏

過沛縣懷縣令顏伯偉與其子同死兵難

誅錯兵來漢室輕區區一令肯前迎何人獨以家為計有子還  
憐史失名主辱固當全大節身亡旋復共孤城夜深河上扁舟  
過嗚咽猶聞流水聲

泊濟寧

路入任城懷舊事誰家有酒當金龜南湖積水將分處孤舟隨



人正滿時翠柳行深烏市亂黃沙岸古燕巢危薰風送暑趨京  
國心與河流欲並馳

東昌道中偶閱畫冊各賦短句

菜

翠玉曉籠從畦間足春雨咬根莫棄葉還可作羹煮

瓜

瓜類一何多吾欲問老圃更乞東陵侯來救渴者苦

茄

種茄糞壤中地力亦易竭厥狀雖不同難將味分別

蘿蔔葱

玉杵削未春金絲束成繚和以翡翠莖併作春盤料

芋薺

鬩鬩滿筐盛上帶封門土咀嚼味還佳地粟何足數

楊梅

五月果初熟枝頭鶴頂丹欲知甘冷好千顆薦冰盤

笋

已抱錦裯兒仍參玉版師吳門啖已足正屬燕來時

木筆

半含成木筆本號是辛夷一樹石庭下故園增我思

梔子

此種為薝蔔名曾載佛書瓣香凡六出卻與雪花如

渡口驛遇風

黃沙障天天半昏砲頭風急萬馬奔何人去塞土囊口天與河  
流一色渾曠野麥苗纔尺許只見風來不見雨雨師風伯不相



能彼蒼高高奈何汝

匏翁家藏集卷第二十三

詩三十一首

謝周尚書伯常送魚次太保屠公韻

自此至京作

南行涉大江喚買隔船窗占夢雖非衆携來卻得雙尺書烹看  
字長缺怨無腔酒熟真堪薦呼童倒玉缸

和屠公次前韻記

賜鮭魚

貢道沂長江頰來出瑣窗百筐皆滿尺八座合成雙尚書例腥  
氣銀為鬣肥膏玉作腔知公食有剩須用置冰缸

吏部右廂前種竹

老翁自把百年量種木何如種竹強乞得已從鄰舍近移來恰  
比主人長成林便擬逃空谷賜筍無勞出上方是日喜有雙松  
為伴侶歲寒高節共剛腸



謝僚友侶公摘送左廂前杏子

一樹臨窗初試花又看結實壓枝斜薰風吹熟甜如蜜投我何須用木瓜

和周伯常謝侶公送杏杏為伯常植者二首

親手移來別苑花隔窗窺見數枝斜蚤知結實甘如許何用青門去種瓜

數顆纍纍映雜花方庭紅日影斜斜夜來風雨還堪惜已似黃臺四摘瓜

謝屠公送西域眼鏡

家藏古銅鏡滿面塵始拂不但人妍媸更可照百物雖然明若此其背暗如漆妍媸既莫辨百物亦盡匿此鏡從何來異哉不可詰圓與莢錢同淨與雲母匹又若台星然兩比半天出時之

近眼睚偏宜對書帙蠅頭瑣細字明瑩類椽筆子生抱書淫視短苦日疾及茲佐吏曹文案夕未畢太宰定知我投贈不待乞一朝忽得此舊疾覺頓失謝却撥雲膏生白訝虛室扁鵲見五藏未必有奇術隨身或持此遂使目光溢世傳離婁明雙睛不能沒千年黃壤間化此直百鎰聞之西域產其名殊不一博物有張華吾當從彼質

舊蓄一鶴部中後三年復來而鶴尚存感而有作

置爾寬閒處憶在三年前三年我復至見爾忽悽然爾尚識我否不識有由然面皺鬚盡白豈似前三年惟爾善飲啄頂朱翅仍玄誰能養爾翅更使羽毛全上飛入白雲下集歸青田飢啄江南禾渴飲山中泉寬閒處在此鴻鵠相周旋終歲被拘摯吾當還省愆



次韻屠公謝伯公送王黃子一

碧瓦盛來黃玉團良工雖巧未能鑽臨風又帶清冰嚼併作人

間六月寒

牛心空是赤團團黃玉懸枝宛若鑽須正移梅三百顆冰盤錯  
落照人寒

歎右廂前枯梨樹

庭院陰疎日又西翛然相對有枯梨霜前少葉遭虫蝕月下無  
枝借鳥栖不及蒹葭猶倚玉爭如桃李自成蹊吾生老態還同  
此秃髻臨風句強題

秋享齋宿

齋閣相通畫舫同置身書卷筆牀中沾衣尚帶丹墀雨揮塵難  
招玉宇風高柳鳴蟬驚旅客枯梨行蟻對衰翁到來兩月慚無

補又是人間伏暑終

偶與屠伯二公論世俗以老態從上為壽徵戲成二絕

六十餘年作宦游未知前路幾春秋人言老態須從上白盡髭  
鬚正不愁

白盡髭鬚正不愁吟詩撚斷更風流從今越把詩吟苦索性還  
教白到頭

謁陵與韓貫道戶部大勝寺前晚坐

高樹叢生積水清亂蟬齊噪夕陽明青苔滿地畱人蹟黃土何  
年繫寺名便與詩家謀共隱不從衲子話無生胡牀坐久涼陰  
下縛木為橋喜更平

小憇昌平城外崔老家

深巷陰陰古轍斜青山不向小堂遮禾苗蔽野多遺穗槐樹參



天自落花百歲遷移燕地事五陵豪傑漢人家主翁頭白無徭  
役閒涉田園看摘瓜

詠肩輿

翼然軒蓋忽臨頭下澤渾非馬少游穩坐終嫌人代畜平行聊  
當水乘舟步依綠樹還相礙臥看青山得自由風雨出陵騎馬  
倦一時無價可相酬

謝屠公送新榛

七月遼陽已降霜簪頭落地野榛香三年不到燕山下又喜頻  
將玉顆嘗

送吳箋與屠公

入手新詩已百篇奉償日費有吳箋故知供得高才足歲取于  
今擬十千

答屠公見和

一歲詩成知幾篇洛陽高價起華箋況公更有鵝群好未滿黃  
庭字五千

屠公和章有一歲百箋之句則百歲合用萬箋次韻答  
之

興到揮毫乏短篇故應相送只長箋請公莫問長箋價百歲都  
來少九千

題元朱本初道士貞一藁後

本初臨川人從吳全節宗師居大都數祀名山所至  
考求地里作輿地圖考其詩文藁名貞一序之者六人  
如虞邵菴范德機及柳道傳諸公皆加稱許而親書其  
文吾友陳雷今王抑夫藏其藁示予請題

龍虎山中託鍊丹身操儒行隱黃冠解衣弄月當泉壑滴露研  
朱倚石壇輿地著書還有考竹宮將命却無官遺編不用重評



品虞范親題在卷端

枯梨結實分送屠侶二公

誰道枯梨生意遲秋來結實尚離離  
斑多或被蚊蠅啣味美還招鳥雀窺  
律在不妨猶擅食詩成相送敢違期  
玉丸流液能消渴日啖何須說荔枝

答屠公謝送家園棗有僂種之稱

詩贈吳郎有杜公西鄰撲棗事還同  
若將僂種來相比小圃安能抵閩風

秋壇陪祀

殿外冷風似颯然卽看庭燎列星躔  
牲肥豈秩無文祀穀熟當書大有年  
舜樂九成神欲陟魯宮三望事猶傳  
小臣十載從龍處憶侍鑾輿向籍田

謝屠公送猫

東菴所居第破屋纔數間何物爭穿牖  
穴地深且跼入夜呼隊出蹤跡殊奸頑  
衣囊屢嚼嚙書架能緣攀厥類雖甚夥  
厥狀亦甚孱卽欲撲滅之寸矢弓莫彎  
誰家有小畜非獲復非豕耽耽視而步  
如虎出深山善捕却容易偏乞何其艱  
公幸恤我患使人忽分頒竒形合相法  
尾短睛懸鑲黑白錯爲章宛同野狸斑  
駭足尚可市此價金千錢今我幸得此  
夜臥不鰥鰥拊牀少叱咤高枕當閉關  
利爪最善獲頭頸血流殷穴中知有警  
遠遁猶窮蠻蘇子休賦點張湯免誅女  
但恐戀舊主逸去須遣還持此爲公謝  
簡略無多刪

夜閱陸放翁劔南集因懷北鄰故陸詹事廉伯益集爲  
陸君借予抄者惜未完耳



北鄰人去已三年，覩物思人爲悵然。不信形骸難玩世，豈如糟粕自遺編。隔牆無客敲碁局，對案誰家棹酒船。九十放翁詩萬首，可憐無復象翁賢。

哀陳一夔

謫官已半刺，出守仍一麾。遠州久未到，豈是行遲遲。此地少文物，蠻夷竊相窺。無由勞撫字，劫掠以爲嬉。置君於其地，常恨非所宜。一朝下恩旨，稍幸得量移。齊安佳山水，足以爲詩資。如何始聞命，已與人世辭。哀哉生何蹇，天道令人疑。懷沙自求死，澤畔非湘纍。君容不憔悴，君性尤坦夷。平生無所好，所好止於詩。每當尊俎間，賓朋爭笑嬉。耳獨若不聞，凝然方有思。積成西潭稿，千首尚多遺。往歲過吾家，首簡乞題詞。雅意久未復，見面遂無期。遙遙度嶺嶠，孤櫬誰扶持。想應只僮僕，返舍當何時。妻子相向哭，悔不惜相隨。薄暮寒窗下，思君交涕洟。詩人例多窮，身窮名不衰。聊將此自慰，亦以示所知。

答劉時雍宣府見寄

懶不修書愧故知，忽傳驛使遠投詩。寒上谷分司地，冒暑西街作別時。助盡軍興真不忝，了來官事却非癡。新年有詔行當召，北望遙歸慰我私。

生日次韻答玉汝見賀

入手投來絕妙詞，忽驚生我日當斯。衰疲強竭驅馳力，老大惟懷鞠育時。上國醺人非麴米，故鄉招客有尊絲。癡兒繞膝爭爲壽，不覺燈前一解頤。

答濟之次前韻

春酒頻行莫致詞，雪園何意客來斯。歲除媿我仍初度，年壯看



君獨後時六尺瘦軀支槁木數莖衰鬢冒游絲故鄉只合先歸  
去況話湖山便朶頤

鮑翁家藏集卷第二十三

鮑翁家藏集卷第二十四

詩六十六首

戊午正月十一日郊壇分獻東鎮

半夜雲煙護石梯燔柴初舉樂聲齊旌幢繚繞天門近臺殿依  
稀海市低恍若神祇相上下秩然海嶽隔東西願言  
聖主精誠意降福穰穰及遠黎

上元日邀鄉友小會

佳辰邀客徧東西誰惜長裾浣雪泥駟馬僅容嫌巷隘濁醪能  
過愛牆低聊因官假休衙早暫叙鄉情入座齊莫念老夫筋力  
倦燒燈直欲聽朝鷄

會飲屠公以不預會次韻見戲因和答之

雪後群山映郭西肯勞玉趾履塗泥市燈入夜光猶短鄉酒逢



春味更低寡和已慙歌似郢衆咻却恐語難齊小堂若設三公  
席四坐人皆作木鷄

朱天昭巡按福建還止宿城西佛寺以不預會次韻復  
和答之

憲節遙停禁籞西南來驄馬不沾泥太微執法星躔近滕六潛  
蹤雪陣低吳下異材原不乏睢陽高會故當齊三年濶別多情  
話小約何妨黍與鷄

送王惟安赴思南推官

年壯曾題太學名蒙恩初喜授官行舟乘驛傳從新例囊帶  
刑書恤遠岷仕路誰為賢郡佐儒門不失舊家聲春風得意過  
鄉國一夜桃花水自生

次韻王汝志得曾孫之喜

男女早婚多一代只今人亦有恒言却慙小子為前輩更喜名  
家得外孫王汝之孫娶于陸陸吳之著姓也吳苑新居真福地于公故事有高  
門客來偶叙家庭禮陡覺今年輩行尊

梨樹今歲復有一枝枯者感歎再詠

閒看梨樹發長吁已斫枯枝旋復枯老態最堪為我伴朽材終  
不要人扶回瞻桃李顏無厚徧歷風霜勢自然試待秋深仍結  
實收功還見在桑榆

讀石崇王明君詞

晉代何人石季倫古詞始倡王明君明君顏色不可見後世只  
因顏色論自茲詞人不一其間言語何紛紛吾思明君顏色  
未必美畫工被殺非信史漢元嫁後漢成世邊塞年年通漢使  
君王本是好色人昭陽宮中瀦禍水豈不學曹瞞念蔡姬黃金



不惜贖蛾眉又恨明君不製十八拍思怨誰將心事知嗚呼江  
都王女已先嫁良家之子奚足悲婦人出處亦有命漢室禦戎  
何失正請君譜作琵琶詞莫怨匈奴怨劉敬

詠吏部後園草木與屠公倡和

桃

城南春色曉移來粧點園林錦作堆嫩綠不須將葉認淡紅已  
是帶花開玄都自發劉郎詠幽谷還教謝判栽此日公門深似  
許書長高鎖正掄材

梨

名果先從張谷來紛紛碎雪欲成堆淡粧自把娥眉掃巧笑誰  
將瓠齒開園子豈求他種接主人能使及時栽天桃灼灼驚凡  
目縞素應甘自不材

棗

蕭森何處為昇來曾帶荒園宿土堆燥壤豈勞長甕灌低枝不  
礙短籬開敢將艷色誇桃樹勝要清陰乞柳栽賴有當時僊種  
語為薪莫漫比樗材

竹

種處能招鳳鳥來月明清影拂書堆笋鞭遇石猶斜出花米逢  
春莫亂開此物似賢今合薦吾家醫俗舊曾栽若從後圃論高  
節梨白桃紅孰取材

杏

花信風寒已早來隔牆俄見赤雲堆竝頭兩樹長相倚屈指三  
春始得開曲水少年誰復探公門今日要兼栽莫言結實供人  
啖破核還堪作藥材



馬蘭草

難呼童子上堦來頭髮髮鬆亂作堆豐草舞風真錯認繁花泥  
雨欲爭開長鏡荷處休教斲高岸崩時合用栽誰擬椽櫓為拂  
子杜陵詩裏獨憐材

紫芥

滿目爛斑布地來春風驚見錦灰堆菜根作苦終嫌咬茗葉浮  
香為撥開何處兔葵嗟競掇昨朝馬蘭悔多栽傳聞此種番邦  
致用向中華亦楚材

餘醪玉簪

春色秋光遞往來憑闌數尺土高堆翠搖釵股風吹墮玉削簪  
露濯開山谷詩中那忍摘唐昌觀裏合求栽花容清麗人爭  
周書問梓材

牡丹

嫣然國色眼中來紅玉分明簇一堆最愛倚闌如欲語緣知舉  
酒特先開洛中舊譜頭須接吳下新居手自栽若向花間求匹  
配揚州瓊樹是僊材

芍藥

品高真自廣陵來舊譜空憐壁角堆千葉連雲如竝擁兩枝迎  
日忽齊開詩中相詭何須贈擔上能賒也用栽記取今年纔看  
起醉吟多藉麴生材

孟夏太廟候祭偶登東園涵春亭次韻

松陰覆處一亭幽涵盡春光送兩眸宮漏稀聞知地僻胡牀列  
坐覺人稠枯槔倚樹禽相語略勾橫溪水自流不是廟庭來候  
祭晝長安得此清游



送徐侍郎公肅致仕

尺疏陳情再籲天病來翻幸得歸田高懷豈為虛名累直道能  
將晚節全鄉社侍行多後輩都門追送半同年只今晏子身仍  
在南去相從願執鞭

對萱花有感

節序交夏至繁花俱已摧幸有塔下萱爛熳猶爭開久旱土更  
燥繞砌無青苔上馬炎烈日下馬撲浮埃如何色仍秀豈是深  
根芟朝將清水沃恐爾晚易萎萎者既先落秀者猶相催安得  
麥與禾似此一回栽年年摘其穗坐食惟加培天時有水旱漠  
不能為災此花號忘憂憂懷翻自來平原空若甑長河淺於杯  
居人及行客愁歎聲如雷感召當分責食祿慚非材

校白集雜書六首

公事初閒就枕眠睡魔偏向靜時纏就中還有醒然處為校蘇  
州刺史編

蘇州刺史十編成句近人情得俗名垂老讀來尤有味文人從  
此莫相輕

廬山秀甲草堂低杭郡湖開六井西所幸平生最佳處坐游時  
按集問題

白蓮青石未為奇官滿舟中只自隨二物千年還在否清風誰  
報洛人知

齊雲樓子化煙埃往日園池安在哉故府荒蕪經世變前賢遺  
蹟重堪哀

山路新開到武丘仍栽花柳近河頭吳人只愛行游便還憶當  
時刺史否



次韻啓南游金焦二山見寄二首

西岷一股翠嶙峋，漂墮東南扼海神。弱水混茫能負物，假山礧  
碗却勞人波光靜耀魚龍夜。地道潛通草木春，更上妙高臺上  
去世間何處避黃塵。

獨游勝地拈詩筆，豈是坡翁有後身。天地何妨容一老，江山相  
對作三人。茶新正趁中冷水，花在能儲四月春。愧我經行猶別  
去，死生契濶不須論。有懷亾友史西村不得同游

又次韻弔郭璞墓

瘞鶴銘題陶隱居，當時同瘞骨應如。詩篇入選非唐製，藝術流  
傳有晉書。山石稜稜孤塚在，江波滾滾一身餘。葬師尋穴嗟如  
許，氣聚風藏事已虛。

飲陽羨茶

今年陽羨山中品，此日傾來始滿甌。穀雨向前知苦雨，麥秋以  
後欲迎秋。莫誇酒醴清還濁，試看旗槍沉載浮。自得山人傳妙  
訣，一時風味壓南州。吳大本嘗論煎茶法

久旱始雨適校白集至喜雨篇因次韻

麥秋麥已無，況種黍與菽。向晚聲蕭蕭，忽聽在枯竹。豈惟驚我  
耳，遂爾拭吾目。起視方庭間，沾衣走僕僕。渠決會須成，簷溜忽  
相續。憔悴兩青松，葉垂若新沐。萱花回故紅，藤蔓長新綠。詩人  
歌太甚，及此和霖霖。時已慮獄囚，詔方停土木。私舍未擬還，坐  
久索燈燭。

晝寢

深院三朝雨，微涼六月天。紗厨垂綠水，竹簟覺蒼煙。不用垂頭  
坐，初傳閣足眠。屠公睡時以物  
閣足自云樂甚孔門嫌晝寢，犯訓幾時悛。



選事畢左闕下臨水東望

柳塘千頃綠雲鋪此景人間未必無金屋朱垣看倒影只除海上是蓬壺

又聞鶯

上林綠暗始聞鶯只許啼來三兩聲莫道詩人聽不慣曾歌伐木愛嚶嚶

小園初名一鶴後鶴失去乃改憶鶴亦以聲之近耳

白羽翩然長似人慣聞呼伴向東鄰清菟招下天還暝瘦骨埋來草又春少保畫圖傳粉墨長公詞賦說車輪荒園不惜名重改過客無疑事始真

和濟之次王汝過飲園居韻

扣門不厭往來頻乘暇相過總故人顧我已爲黃面老與君不是白頭新小園樹朽更三主委巷牆低少四鄰日暮持杯難作別吳音滿坐語偏真

久雨遣悶

濕雲壓簷低不省猶是晝倚檻閱書編簷頭自懸溜銅盆置庭中點滴若刻漏須臾雨來多聲響一何驟虹背何曾彎雨脚不停走溽暑類江南濕氣屋未透小戶困沮洳俯出從狗竇頗聞石炭貴妻子自相詬幸此得安居無術爲援救硯沼映木煙寫懷不能就

公署阻雨晚坐

公堂吏散下孤幃畏向長途冒雨歸壓架漸看藤蔓長墜階初覺豆花稀蛛藏簷隙難施巧鼠嚙書堆定苦飢最是農家憂水溢坐慚支祿更垂緋



夜宿公署不寐

郎吏巡風夜未眠老夫愁雨亦醒然暑回河朔三秋景潤比江南五月天似着寢衣齋榻上卽聽朝鼓禁門前爭如蓑笠歸胥口蘆葦叢中泊釣船

謝文宗儒以茶榼寄贈

疇昔山崖與水濱行時茶具每隨身俗緣未盡還分郡清物猶存合贈人陸羽已嘗泉最美遲任休說器惟新只今紙裹真堪笑携去尤驚范景仁

月蝕

怪哉如有物來侵奔走臺司奏鼓音魯國不書非史闕盧蒙多詠亦詩淫蒼蒼正色天殊近隱隱幽光夜向深正是生明人共仰浮雲來蔽又成陰

小池種蓮未發而葉頗盛晚坐賞之

秀色亭亭插淺波翠艸擎處只高荷江湖入眼誰嫌小風露驚心已覺多白羽似搖詩莫詠碧筒堪飲客須過晚來閑聽蕭蕭雨獨欠扁舟着短蓑

聞故園山茶爲人所折

山花昔年植正在竹亭西雨露頻長養豈同蒿與藜廿年始還家見此枝猶低隔歲綴芳蕊花開剪成緹亭今已撤去亂石登爲隄復此與花別夢寐不能迷頗聞此樹下春來踏成蹊衡門不常關頑童皆有携如何忍攀折狼籍滿春泥遂令烏雀至月夜無枝栖淵明問來使草木入詩題安得人愛惜高與南簷齊

謝陳原會寄方鳥

佳製新成一尺方退朝便作野人裝他年吳下登山好着屐應



憐去齒忙

聞西墳新栽松樹甚茂

東墳長松樹風雨屢拔之落落餘數箇古藤相附麗西墳近所  
築數畝平如坻嫩檜旣環植新松亦復移移來自西嶺其短纔  
牛蹇草棘每為厄腰鎌要鉏治常恐山叟懶不見暢茂時家信  
忽遠至幸藉春雨滋青青自拔起芄芄異茅茨千尺由寸莖長  
松總如斯百年藏吾骨清陰抵高帷寄語子姪輩愛護當從茲  
種蓮公署有一花一房之異

畫說人家有瑞蓮何人曾見綠房駢冰蚕分臥頭還竝翠鳥同  
棲翼自聯莫信楚江萍似斗空聞泰華藕如船戶曹得此真爲  
異定兆年年大有年

朱邨公挽章

虎城西踞壯神州身屬安危四十秋小大皆蒙賢將福東南不  
繫 聖君憂九京地隔旌麾偃百世人膺爵邑疇能保榮名  
須令德古來休比富平侯

補壽徐閣學七十

黃閣身居近五雲四朝弼亮古嘗聞曾因舊學稱良傳常有嘉  
謀告 聖君故族遙傳徐孺子義田重置范希文萬方錫福  
須勞助壽域高躋更策勳

恭題 宣廟畫所翁畫龍圖

黑雲作雨初收脚似有飛龍露頭角恍然拈筆欲寫之日眩金  
鱗仍走卻所翁好龍非好真 真龍自爲龍傳神小臣稽首不  
敢視龍去鼎湖經幾春

題友雲吳尚書忠節錄後



南望滇池新廟開忠賢遺象許誰陪  
早知斯世為臣義不負中朝  
出使才辨髮冑因胡俗變戴頭真  
向虜庭來百年宇內終當死大節  
堂堂未可哀

去  
予既以憶鶴名園復有致一玄鶴者蓄之月餘一旦飛

短垣局促損精神憶鶴名園又有因野性未便煙火食高情誰  
會水雲身縞衣化盡京塵滿碧落招來海月新東去青田如不  
返須防矰繳遇虞人

送少師徐公致仕歸宜興

丹陛班東第一人

聖恩初許作閒身麟袍玉帶辭黃閣

龍敕朱函下

紫宸盛事敢誇今最少賢名當使久如新平生

杖履相從志看畫溪頭擬問津

送吳克溫奉

旨護送舅氏少師公南還

千年詩裏渭陽情往送誰辭此一行  
御筆批來真有旨驛舟馳去豈無名  
相君久仰為前輩舅氏相親是外甥  
却到荆溪兼定省白頭堂上喜還驚

詠水紅花

繞庭秋色為誰奢舊譜無名亦自嘉  
垂穗豈殊香稻粒映叢惟少白蘋花  
事忙豈有閒情種人老如將醉面誇  
畱向窗前娛晚景涼風起處莫吹斜

讀濟之撰貢士顧伯謙墓銘

墨痕濕處石初鐫入手銘文忽悵然  
好學如斯真可許成名自昔豈無傳  
嚴親拭袂當靈几幼子攤牀亂舊編  
落日起亭呼不起鄉邦爭惜後生賢  
伯謙號起亭



次韻王汝新拜南京僉都御史之作

東街車騎少相過  
況聽南行又作歌  
多何甚短晨星落  
落更無多豸冠旋製  
峩晴書鷁舫遙馳  
壓碧波却訪舊游  
經虎觀也勞清夢繞  
鸞鳥坡

予偶衣褐傳曰川舉孟子語見戲蓋以予名字相屬也

予以褐為賤者之服服之固宜亦仍孟子語更號褐夫

因作詩發曰川一笑

僕本吳中一賤儒  
久慙朝服強紆朱  
肯忘往昔稱匏老  
只合從今號褐夫  
養勇怕逢宮黜輩  
受屢願作許行徒  
欲知名字原相屬  
試檢軻書定不誣

次韻劉時雍歸休畱別

竝綴朝班愧長年  
曾談雲夢有腴田  
天臨闕下頓投疏  
水落灣頭早問船  
蕪馬歸山無一蹶  
吳蚕登箔過三眠  
岳陽樓上江湖近  
范老高文定宛然

觀土魯番遣使入貢

西行萬里度流沙  
職貢重修遠慕華  
詔下已將金印復  
師還不用玉門遮  
毳衣伏地皆專使  
皮幣充庭有數車  
介子目甘為盜劫  
奇功莫向聖朝誇

元高季迪輩又有經永定廢寺詩後構造復完而堂揭

海印舊榜乃元泰不華所書雄偉可觀今年秋寺忽毀

于火予少嘗讀書于此因為詩惜之

廢寺經行處前人  
句裏來一朝不戒火  
百歲幾掄材齋閣空  
春樹池塘滿劫灰  
舊游真不忌誰掃  
讀書臺

原和合

原和合

原和合

原和合

原和合

原和合

原和合



詠甘菊

秋來有佳植種類繁且奢灼灼滿庭院其名爲菊花世人重顏色稱號何其嘉一種花甚小叢生只山家不假人修飾娉娉任欹斜味甘而不苦色正而不邪采之可以食苗葉嚼無查與杞氣味合天隨賦中誇吾老逾六十不圖數年加扶衰正藉此何須紫河車有客分遺我細根帶泥沙霜餘已枯槁實落手可爬明年當早食春風又萌芽

題郭錦衣新宅假山

坐對前山起夕嵐只疑身到大江南危當樹杪雲峯倚清逼窗間雪嶺含夾道似分青玉峽入門全類紫陽菴主人愛石因移宅袍笏還如米老參

閱黃山谷集見八音詩戲作一首

金鍾奏初響石磬聲難和色絲語終晦竹簡字偏磨置向匏翁前自擊土鼓歌詩家有因革豫章如木何

題王浚之畫茅山圖

句容古縣頻來往萬轉荒溪出亂松畫裏茅山依舊在白雲開處見三峯

送同年周公載運使擢按察使致仕

天馬行空莫敢驅十年爭歎服壺車  
竭來闕下增新秩竟向闕南問故居  
名姓愧聯春榜舊聲華喜出戶曹餘  
平生高致公應得竊祿銓曹獨笑予



天恩家藏集卷第二十四

送同平周公燁與對安

夢見三峯

同容古... 山... 山... 山...

雙... 山...

朝... 草... 木...

金... 山... 山... 山...

匏翁家藏集卷第二十五

詩六十三首

已未正月十四夜與頤園中看月

短垣先見月東升踏月行歌傍古藤此物要知終勝火莊子吾

家方恨正無燈聊從杖屨憐兒子不設杯盤愧友朋白髮慚多

良夜少仰天亦欲繫長繩

送梁洗馬使封安南

五鳳樓高賦早成交人先已識才名誦詩三百能專對問路西

南却易行封冊遠頒金字細賜袍新製赤文明平生不是相如

輩鄉里何勞負弩迎

夜宿公署二首

脩然齋閣炷香清省吏循牆已報更案牘頓疎詩易得牀幃初



下夢難成數莖細草繁霜少一樹枯梨片月明春半故園花盡  
發主人何處逐浮名

倚牀長聽夜鷄鳴顧影頻吁三兩聲思穎徒為前輩事游燕不  
是少年情已藏舊曆開新曆莫置長檠棄短檠惟有註書心未  
老窮愁何必比虞卿

失猫偶讀古人十二辰詩戲作一首招之

鼠輩公然書出游厨中恣食肥如牛虎斑非鄴憶此物兔口無  
闕嗟為儔徒聞秦龍術曾學安論捕蛇功可收塞翁失馬終非  
福牧子亡羊政爾憂獼猴若馴我豈愛鷄犬或放人須求歸來  
買猪肉餒汝置汝十二生肖頭

詠南內新柳五首

宮柳條長綠漸深苑牆一帶欲成陰鑿與春半稀游幸不用相

如賦上林

向來千樹總枯楊又見青青覆苑牆獨有老人堪歎息春風不  
到鬢絲傷

節近清明柳色新玉河橋畔少車塵都門送別應無數誰敢臨  
岐折贈人

綠嫩遙看更碧柔非煙非霧曉難收牆高不使花飛過却化浮  
萍出御溝

狂風吹得數枝斜翔鳳樓高未許遮忽聽啞啞無處覓不知葉  
密已藏鴉

梨樹盡枯下復發數花更識感歎

數花明處夕陽遲屋角春風不滿吹短枿未多行蟻下孤根亦  
有螿龍知詩家只愛歌桺葉老婦如看舞柘枝歲復歲來人共



老星星白髮總如斯

獨遊部中後園看梨花簡舊寮宿公

紛紛香雪覆南牆去歲看花共下堂春滿名園非洛下人如前  
度少劉郎官途易散浮雲薄公事初稀白日長更過數朝應落  
盡重來一醉亦何妨

次韻王汝報恩寺訪舊蓋營同寓文僧房今三十二年  
矣

步履重臨塔影邊禪房深處裊香煙金陵王氣惟當代蘭若清  
氛似往年花石映門幽徑側竹林圍屋古臺前舊游零落多詩  
思莫怪摩挲為悵然

酴醾花下偶成

手插芳根傍右廂春來競發似新粧驚看白髮三千丈笑對金  
釵十二行為想得名因以色若教結實定無香花開閱盡人間  
客百歲都能醉幾場

祈雨齋宿

青天一片月初肥貪看從來惜素輝春盡酴醾綠架發夜深蝙蝠  
遶簷飛安居獨守垂堂戒飽飯難逃素食譏坐久載歌雲漢  
句不知天意與誰違

二月十五日殿試東閣閱卷抵夜始出

五鳳樓前滿素輝黃昏踏月過彤闈遙聞銀鑰將收起莫認金  
蓮獨送歸三百登科無曲學九重側席定宵衣不緣儻直初來  
此宮樹驚鳥欲亂飛

十七日東閣喜雨

三日齋居念 聖躬麥秋將至重農功下方和氣能為雨盡



日濃陰不作風灑徧北門簷溜急挹多東閣硯池空緋袍不惜  
皆沾濕抱卷初來翠殿中

憶前年是日雨中與李世賢同游吳中西山

肩輿冒雨過田塍又歎人生二歲增鄉里喜逢青瑣客山林驚  
見白頭僧龍門截莫雲千疊龍門在天平山松徑逶迤嶺十層自支硎至天平

東鄰葉翁送白牡丹

故園兩歲夢鞋紅鳳尾花新百種空家有牡丹一株花後有錦  
幄未能如富室瓦盆亦足慰衰翁一枝爭買金錢滿三朶齊開  
玉盞同獨恨春深無暇賞暮歸吹落又狂風

初聞鶯

屋上鶉鳩無數鳴春來何處有流鶯年華荏苒終三月音調間

關第一聲幽谷出來如有意上林投去又無情吳城東畔茅亭  
下憶在垂楊夕照明

秦公邀賞左廂前芍藥

妙手何人簇絳紗平臺驚見數枝斜梁家園裏無遺種往時小  
氏芍藥最盛號梁家園人多携酒吏部庭前得好花量淺莫將  
賞之後其家廢遂無一本在者深羞酌眼昏猶用密簾遮詩中近侍非公論誰說唐人是作家  
唐人詠牡丹有芍藥與君為近侍之句

病目

吾生短視物如遮老眼重增滿黑花及席終當憑相者檢方須  
用問醫家欲看花已過三月未讀書應尚五車昨日臨池猶作  
字數行春蚓總歌斜

太廟候祭復游東園



百畝園依清廟開去年首夏憶曾來繁花盡落畱紅藥新笋叢  
生帶綠苔北闕倚雲通劔珮南宮隔水見亭臺令人又作山林  
想況有蕭蕭白髮催

次韻周伯常尚書秩滿

海內頻逢大有年績書三載不徒然太倉未發陳陳粟東省須  
開秩秩筵近荷寵褒卿有理近有內臣陳乞一事公執奏不久  
已竟蒙旨云卿等所言有理違清誨我多愆青宮舊學當年事執卷猶思傍細氈予與公舊  
為寮友

又次韻紀謝 賜物

紅日初高啓九閣詔傳馬上小黃門物頒八座雖常例身事三  
朝有舊恩早戒吏人書象笏暮開家廟勺犧尊仰瞻喉舌公須  
應囊括休占六四坤

題朱澤民集古玉圖後

五瑞示信存虞書玄圭錫禹成功初後來列國分寶玉魯璜楚  
璧皆其餘闐河方折不愛寶昆吾刀銛雪同皓辟邪人馬若天  
成瓊環瑋琤猶文藻臥蚕盤螭看更好細數三十種非少今世  
誰為張茂先試言此物何人造雞冠蒸栗及猪肪土花半蝕痕  
蒼蒼其間直出三代上遺形尚發孚尹光龍眠居士不可作洗  
玉池中水應涸何如征東舊提學過眼寫之無執着丈楮流傳  
二百年妙矣宛如新出璞

李時雍戶部久居南土端午再蒙扇縷之賜相與感歎  
有作

身到彤庭續舊游御橋俄與百官畱趨朝步澁雖難進賜物恩  
濃好共酬字扇有銘休障面綵絲成縷欲纏頭端陽節近題詩  
慣謾說江南競渡舟



讀劉靜修先生集

木落西山見一峯容城何處問遺蹤德輝欲覽空翔鳳王業如  
興有臥龍隱蹟微茫隨世代悲歌激烈發心胸靜修齋裏高風  
遠晚學摳衣恨莫從

竹園壽集 別有序

七客同期賀誕辰古詩三壽句如新合為一百八十歲傲樂總天語  
是東西南北人露下高松如細雨風回脩竹滿清塵香園雅集  
今重見良史當筵亦寫真

次前韻自壽

予惟乙卯是生辰老大無聞白髮新韓子立朝猶此秩温公入  
會獨何人温公預真率會時亦年六十五瞥然一世如驚電瞠若三賢豈後塵  
更待他年為此集香山容我作劉真

次韻周公自壽

莫較生年卯與申忝登科甲亦為辰三公齊壽今難竝兩署同  
官舊有因翰林吏部節傲歲寒依竹祖陰連夜合對花神吾皇錫福  
真能助願築春臺徧九垓

王汝年亦六十以擢僉南臺不預壽集因次前韻以寄  
誕節曾聞歲在申善忘無復是生辰王汝生日每忘賀北都遠眺惟南  
國三壽同躋少一人臺署升堂分柱史戈船鼓櫂動江神兼管江  
直看更得玄孫喜祝頌無如此意真王汝年未六十已得曾孫二人

端陽邀鄉友小飲

此日端陽兼夏至佳時又喜有詩材城中強取園池樂海上正  
當風雨來鄉郡繁雄休復論賓筵狼籍更須陪人生會合非容  
易馬上何妨看月回



秦公崇化為江西布政使時嘗泊九江忽見數舟遭風  
被覆使人救之獲生有為詩美之予亦為作一首

九江柘磯風力惡白頭浪起舟難泊魚龍跳舞客愁檣傾楫  
摧凡幾舟浪裏漂流命如擲岸上何人獨相惜須臾挽之登柁  
席仁哉賴有秦方伯此事傳聞爭歎息嗟嗟江西之民有萬億  
溺者豈惟為賈客不知陸地上方伯舉手長援溺

王延亭西植夜合花二首

夜合花開滿樹紅吳人賤汝號烏茸家僮斫去為薪用却向亭

西植兩叢東莊有夜合二株甚鉅家僮惡其覆水斫去之

兩叢如杖植亭西暑月能遮赤日低待得成陰吾已去後人須

記白公題白樂天詩夜合花開日正西

董北苑溪山風雨圖

黑雲擁高山頃刻風雨至豁然海潮聲艸木爭偃地曠野少人  
行山僧獨歸寺衲衣盡沾濕敲戶何急事倉皇村居民乘屋亦  
何亟一婢已抱甕一婦更持器重茅惜被卷破屋家所寄戴笠  
者漁郎理網屈雙臂老翁若望家擔物終不棄陸走向甚危水  
行可無畏前溪波浪惡篙折水流駛行者當早歸居者不預備  
良工為此圖三歎有深意想見晚來晴雲淨山潑翠始信霎時  
間天工特相戲

次韻李時雍病起二首

病骨稜稜帶白須誰知詩腹却長腴黃扉出納聲名久紫禁追  
隨意氣孚終喜和鳴同瑞鳥難教馳步學生駒西風欲起猶持  
扇應怪元規塵易汚

南國遙遙望眼舒承恩相好自傳臚強煩官秩居金部幸接班



行在王除旱比往年何大甚暑從今日是多餘是日入朝又喜披公服侍史須將日曆書

### 哀文宗儒

吾鄉沈衢州遠致尺書在發書報文侯有疽發于背我憂體肥人此疾恐為害猶冀有良醫或倚以致瘥憂懷適浹浙疏馳獨快乃六月七日死期特兼載哀哉此良牧天奪真可怪念昔為永嘉勤政略不懈豪民戶先鉏淫鬼祠必壞撫下自有術百里免凋瘵及此領郡符先聲過疆界窮谷爭出迎耄倪總羅拜君初聞再起仕路厭行邁因察民情歡下車始無悔爬梳積弊源一旦決欲潰坐堂日孜孜訪問及細碎孰為狼所貪孰為蚊所嘍狂獄滿冤囚親手為破械去歲東海涯充氣作妖怪橫飛類鬼車數丈無首戴具疏即自劾遂及弊事槩謂此如許除吾寧自引退有司格不行當道有窒礙公退長太息空負民所愛吾惟盡職業庶償為守債使民自按堵守法勿就逮百家立為約禮義相告戒民曰賢侯言敢不各敬佩君終抱憂思弊事卒吾敗大者如鹽鍊骨髓竭稱貸彼力固已窮吾體亦真憊遙遙走一使求去乃至再知已總愛才不使投匭內孰知今日事俄有此變態凡君求歸休民輒歎無賴群情達鈺曹以及察與案今也魂茫茫棺歸只空解豈惟民無依失侶嗟我輩久為晚年期几杖作鄉會對酒之清言臨事無善誨城西多舊游山色愁晚對有穴未及臨淚盡繼以嘅

中秋夜偶過濟之忽鄉友數輩至遂成良會濟之有詩

### 次韻

晚涼東巷偶相過小適園中奈近何秋到共傳平半好客來不



速過三多金尊注酒微微飲綵筆題詩緩緩歌白髮滿頭重看  
月素娥應笑已非他

次韻周伯常落齒

人具脆奕軀老至必衰矣向來少女時金石自比擬孰知銷與  
泐成壞乃常理何必驗他人亦嘗察諸已憶昔為兒童當門齒  
先毀家人不驚異嬉戲翻噴水忽忽六十餘僅保此頑體齒勢  
終欲落幸未與公比公年視吾少却以落齒耻且云半百初齒  
即已落只今歲落到牙而年順及耳動搖每朝扣藥物更服餌  
作羨怯駝蹄下飯愛牛乳存者費剔肉尤苦於目眯又如澗中  
石漱處帶泥滓有齒且自落有命當自俟多為引身謀區區緣  
數齒

題三忠廟廟在城東祀諸葛武侯岳武穆王文信公都

人周珍買地以建者

都城東面起車塵廟貌巍然見昂新漢業強從三國號宋家難  
贖兩賢身朝班可勸為忠事野史能歆好義人上下千年同室  
坐有周端合配三仁

送濟之歸省

冰花欲結潞河灣驛棹南行未許閒恩賜已知千鑑重壽容

應見兩眉彎天高鴻燕難相值予再入翰林而濟之適去春到江湖及早還

安得從行仍作伴勝游當共了西山范石湖游洞庭山詩云西

游東山獨欠西山之游耳

送馬秀才

成化戊子冬予上京會試除夜宿清河口汪

為棺歛返葬頃其子淳來謝因以詩送之

昔過清河古縣前三义田舍憶曾眠停車暫寓當除夜懸矢物



生已壯年丹旆可憐依旅殯素冠深愧附官船天寒水澁驅馳  
遠行孝應將姓字傳

再入翰林次韻周伯常見寄

天曹昔忝挹清塵仕學兼資意更真三嘆已沾松下露一墟如  
沐瑄中春唐朝學士聊兼職周禮司徒重教民闕下方期從步  
履衰年病肺恨多屯

內閣閱秘書喜得石湖集

衰年何意到文淵萬卷書中又木天賴有好書心未老開厨先  
得石湖編

冬日内閣閒書二首

午夢曹曹在舊曹隔窗人語怪嘈嘈日光不到疎櫺上始覺宮  
牆數仞高

簷際濃雲故意黃初看微雪點宮牆外邊寒氣知尤甚更燕烏  
新取酒嘗

自述

行年六十五多病力尤微館閣無才稱山林與願違白頭休傍  
鏡瘦骨不勝衣強作趨朝步低頭過瑣闥

早入直房

鳳樓西北望乘月步未深舊館聯詹事新街復翰林背燈聊養  
目面壁豈明心石砌重登處何人識足音

輓陳堅遠通判

黔陽出宰向南馳通守長沙又幾時每愛清修長向慕久無佳  
報已生疑故家譜在多遺事合郡人應有去思難弟相逢能慰  
我為談接武得麟兒



喜杜子開將有興復先世延綠亭之意

隱儒雅號託東原因對旌門有小園瓦礫未除庭館廢衣冠不  
乏子孫繁便栽美竹開脩徑更種垂楊築短垣誰作杜陵興復  
計平泉有記不須言

病肺

肺病從何生茫然使我疑安得上池水飲以洞見之其初動則  
喘百步足莫移有如登山然氣息促噫噫胸膈痛若刺坐定須  
少時寒風屢擊搏咳噦理所宜聲出難自制痰生與聲馳長夜  
兀兀坐披衣踞如箕倚牀嘔出心撲撲連涕洟服藥罔奏功古  
方豈予欺中心竊自忖吾當詢上醫醫云肺受病火邪鬱于斯  
乾枯口欲飲洪大肺不遲其證見於外不待言而知大腸為肺  
表又為脾土司其法當治本此病其已而我聞上醫言直以病

源推孰知年老人自與病為期血氣已先耗精力從而衰百病  
乃橫出豈但肺與脾譬之庭前木初發甚榮滋及其歷歲久自  
爾枯而萎根非不附土壅漑亦徒為人病實坐老藥力將安施  
惟當蚤休退日暮恒熙熙內以養寸心外以息四支庶幾全天  
年瞑目與世辭坐客多多訝吾言是醫師

病中讀白集擬作二首

爐中添炭火長紅屋底翛然一老翁褥厚枕高眠未穩飯香  
美食難空豈因避俗居深巷即欲趨朝怯冷風纔得安閒使生  
病官高休更說三公

紙窗糊密一燈明古木號寒欲二更棲鳥竝枝知雪候蟄虫坯  
戶避風聲蠹編亂向書厨積蛛網難從藥裹生何事衰年成肺  
病旁人莫訝酒為名



范石湖集有臥帽詩病中畏寒略效其制

牀幃夜下入寒颼臥具新成頗自宜落帽孟嘉無復爾結纓季路亦何為老來髮秃兼能護近得頭風不用醫欲向石湖傳舊樣堯叟相似只存詩

觀烏絲競渡圖

五色彰施成畫片刺繡刻絲吾屢見何來一段蹟尤奇烏絲細入鵝溪絹首印尾掉紛龍舟天潢競渡過中流虹橋千丈彎如臥雲閣半空高欲浮輕舸蕩漾呈百戲吹笛擊鼙爭意氣冠裳立候總朝臣御駕來應鉅是偶觀妙手絕代無老眼頻疑畫史摹女工挑綫亦常有誰聚氎毛為此圖印文特識元文代上有奎章天曆在么麼十五字題名至大仍書庚戌載後有字二行曰至大庚戌王振鵬為翰林承旨曹公作御府畫圖皆等閒後皇對此獨開顏苑中刻

木能依樣贏得都人號魯班順帝性巧自製龍舟人稱魯班天子

美曹太守毀淫祠

神耶妖耶吾不知相版五色錯雜施牆隅小廟瓦數片吳下人家家有之家人有病問卦師師云汝病神所為殺猪烹羊陳祭品歌謳贊歎上酒卮侑以吹竹仍彈絲號以茶筵真酒席宛如生人宴會時有祭自豐病自危吳人豈皆白鬚眉如何至死猶不悟惡俗信鬼不信醫豈惟生死于神聽商賈出入聽指搗賢哉黃堂曹太守諭民此事何不思聰明正直者為神焉有嗜汝酒與犧祭者得生不祭死神道所好何偏私且彼為神既尊貴身居小廟嗟何卑汝民愚昧誠可憫憫汝徒費空家貲太守升堂朝出令民心敬信猶著龜爭持神象出門毀烈火三日焚無遺端如人醉今始醒風化頓覺隨時移唐有狄公任巡使美政



先聞毀淫祠後來入朝作賢相邪鬼安敢侮與欺我願吳人常  
奉令自此崇正無復疑祖先當祭祭勿薄五祀當祭祭勿遲遂  
成美俗載郡志當與賢守名同垂

壽都憲閔公七十

宮保官高壽古稀臺端德重自生威浙西山水鍾清遠斗北星  
辰傍紫微執法獨蒙公論許引年難負 聖恩歸眼前相稱  
緋袍好增秩須將玉帶圍

雪中朝回題陸全卿所藏趙千里臥雪圖

水閣傷寒塘雪深沒茅把曉見白皚皚松竹枝盡亞天闕集朝  
鞞冷風透雙蹠須知臥雪人猶勝踏雪著

煨橘

洞庭雪後顆燕市雪中團冷比冰冷柱堅於金彈丸齒空誰嚼  
得指瘃欲投難舊作糖囊詠今將火齊看炮來非入藥鍊出似  
成丹香噴皮初剝園收核謾鑽人情惟軟熟風度少寒酸莫向  
吳人說家家正滿盤

刻李貞伯篆書海月菴扁

篆法久欲絕李公得真傳近時鄉先輩彷彿如滕權昔為我題  
扁握筆指腕懸顧盼張髯鬚起立竦背肩俯仰為陳蹟屈指十  
五年破屋垂雨溜厚牆上蝸涎三字被侵蝕黑點猶高懸海月  
夜照之墨光却新鮮正如公性氣精悍老猶然見物不見人吳  
山隔重泉惜哉不可作手蹟忍弃捐壽以西川木良工善雕鐫  
庶幾如坐對印面在屋椽



匏翁家藏集卷第二十五

匏翁家藏集卷第二十六

詩五十首

元日早朝次林亨大韻

聖主朝元再遇申

戊申改元  
今復庚申

萬年行夏盡從寅  
雞人高唱時為

卯鳳曆初開日屬辰

是日  
兩辰

傳出制詞均大慶  
獻來方物見咸賓

登臺定有占年者  
平日條風是好春

郊祀翰林朝房齋宿承傳曰川見過

僻宿東行近

紫宸光茫昨夜動  
初春久傳天上騎  
箕事能念

河西斫桂人空谷  
聞音真可喜  
小童見跋却堪嗔  
清茶一啜忽

忽去千步長廊月色新

夜坐復次韻

靜坐焚香拱

玉宸喬柯隔屋已含春  
流年不覺重加我勝日



方知正屬人裊座有詩家還索詠駕回俗士定生嗔郊南豈  
是嬉游地拭目應瞻萬物新

宿神樂觀

神宮游處擬華胥臺殿分明切太虛衰病豈能供祀事幽閒纔  
得遇齋居高林聲撼春風厲小閣光浮白日舒向晚困來先索  
枕且從莊叟夢蘧蘧

過沈道士舊館

神宮有地在西偏舊館重尋又幾年座上獨詢僊伯壽沈年已  
集中如詠古人篇沈休文有游沈道士館詩當門老樹根株盡隔屋斷棟宇  
連誰說桺源能避世雞鳴深巷滿人煙

元夕邀鄉友會飲

絳蠟初燃上小廳繁花忽地滿圍屏前年客籍休重檢合座鄉  
音自可聽鼙鼓風傳通夜市草堂月出隱春星諸公勲業他時  
事此夕杯行且莫停

次韻屠公過賞繚絲燈

聊乘佳節枉群公特設屏燈照醉容雲母擘開成五色鮫人織  
出費千功似觀池上閤生畫學士象相稱筵前李賀鍾銀燭  
再燒光正好只疑身在玉樓東

過鄉人賞燈

新春車騎集東街共愛華燈盡好懷屈曲屏將雲錦簇方空斛  
是玉絲排鬼工瑣細終傷巧蠻舞麤疎亦類俳坐久錢簫聲未  
斷更燒銀燭過書齋

同年會飲

當日城西約已違同年作會恨何稀老身忽歎將專席舊物空



憐是賜衣僅有八人連臬府都來九度過春闈安能盡赴天書  
召坐滿長筵齒更依時陳瑞卿以山東副使來考滿

送同年陳瑞卿憲副還臨清

坐臨雄鎮近齊東六載褒詞出考功臬府晝開兵衛肅郵程水  
長檄書通賢勞當在超遷上契誼頻從雅會中最是灣頭催解  
纜畫船南引恨春風

次韻沈石田題奕姪影翠軒

天街眯目滿緇塵竹樹誰家自作鄰吳下正憂連歲旱燕南如  
見故園春臨窗弄筆圖偏妙對景題詩語最真他日軒中須晏  
坐翠陰應覆白頭新

園中作石臺其旁多棗樹以木末相結如屋形

石臺清樾淨埃塵枝榦相樛結構新司馬花菴工最省申屠樹  
屋事成真野航恰受無多客大厦將顛自近鄰却笑平生鳩比  
拙作巢聊爾獨栖身

吏部右廂前有朱藤一株予手種也今歲始聞花開甚

盛

手種朱藤已七年長條緣架每相纏只看葉密清陰覆忽報花  
多紫粉懸風下掉頭嫌一老雨餘舒眼盼三賢從今堆字詩還  
和寫入當時艸木編

六月十三日園居喜雨

溽暑三朝北土無翻盆一雨已連晡只從碧落傾銀漢不用清  
冰貯玉壺風偃小園紛艸木水深平地欲江湖忽然志喜緣何  
事弧矢漂流走羯胡

園居雨後六言四首



鑿渠暗疏積水開徑賸引清風初喜一場雨過夕陽正射牆東  
水接方池綠滿花填小徑紅疎日落槐虫自起雨多菊虎能除  
高荷種出幾柄矮竹移來數叢豆莢新生自綠葵花老去猶紅  
清咲每憐白鶴長號頗厭玄蟬晚來更有心事窗下自收簡編

觀天鵝池中對浴

白羽雪同明游戲綠波裏為我增顏色小池亦清泚新蒲生正  
繁高荷淨如洗衆碧相掩映倏爾欲藏尾萍藻浴且浮恣食更  
從爾爾本雲衢物何時落塵滓猶勝樊籠中容與莫驚起

玉延亭傍新開小徑二首

路轉朱藤近水涯過橋常恐墮青鞵如今足力直能省五步移  
來即上塔

牆隅隙地結茅菴只尺孤亭手可探獨自步來從捷徑却無人

道是終南

新正無事偶閱鄉先哲范文穆公石湖詩集見其多道  
吳中事因摘取其句有涉于春者輒賦一絕得十二首  
蓋予入官適三十年處世幾七十歲公私所繫不即歸  
田賦成令兒子輩誦之恍如身在吳中亦可以自慰也  
昔人有和陶之作予僭名為唐范其不免文穆公之笑  
乎

雪寒探梅

詩云吳下得春元自晚

新年京國競繁華東巷深居自一家春到不如吳下晚石湖詩  
裏探梅花

賞海棠

詩云聊為海棠修故事

探梅直過萬山隈手內何曾折得回故事重修春不斷石湖詩



裏海棠開

新正書懷

詩云先渡南村學灌畦

注新圃在湖南名范村

年來雙足弱難行却遣郊南再看牲夜半范村將夢渡石湖詩裏一舟輕

春朝早起

詩云寒惟病骨知

新正有假放朝官夜宿齋房睡未安却怪山林猶早起石湖詩裏怯春寒

元日立春

詩云交運丑支辛

吳中士女愛迎春爭看千行百戲陳

近歲吳中迎春以物貨各置綵亭中而諸行賈從其

後視昔為盛

兀坐窗間論歲序石湖詩裏丑支辛

詠吳中二燈

詩云雨絲風外縷又云弱骨千絲結

裏看絲燈  
吳中元夕舊相承街上家家搭竹棚夜靜風沙吹滿屋石湖詩

丙午新年六十一歲俗謂之元命

詩云歲後當生次星臨本命辰

裏記星臨  
強將華髮戴朝簪元命來七歲深我比前人尤覺老石湖詩

春日田園雜興

詩云一年一度游山寺不上靈巖即虎丘

裏去游山  
靈巖上了虎丘還春到吳人更不閒兩地一年仍一度石湖詩

春困

詩云諾惺菴裏呼春困

注吳俗立春日兒童以春困相呼

菜盤椒酒憶江南春困相呼我獨堪世外尚無人解此石湖詩



裏諾惺菴

乾道辛卯三月望夜與周子充內翰泛舟石湖距九年復以是夕泛湖有懷昔游

詩云石湖花月浮春空憶共僊人同短蓬

紫薇村北暮煙收花月浮空記昔游我後益公還識面石湖詩

裏泛僊舟

自橫塘過黃山

詩云東風已綠南溪水更染溪南萬柳條

溪南萬柳綠成灣先壠頻年抵暮還遙望松楸常灑淚石湖詩裏過黃山

民病春疫

詩云連年薄熟甑生塵又云疲氓憊矣可更痛

吳田連熟事非真半在官倉半在人疲憊滿村春病疫石湖詩裏歎吾民

為倪尚書題王孟端合人墨竹上有胡祭酒詩

翛然見此林下姿清省頗類陰何詩舍人自得揮毫趣湖州已逝前無師平生見話足高致俗子來乞以手麾不知此幅為誰作增價況有願菴詞青溪太宰童子時自言故人持贈之立朝卓卓重風節此君契合能相資南來行李特携此不忍棄去緣心知自公退食持示我似竹可喜何須疑為公臨楮賦淇澳清風拂葉猶猗猗

為陸全卿題米南宮雪景

北固山前江水清長供此老濯冠纓焚香寶簪齋中坐江山寫入毫端輕此老胸中有奇氣不與衆史閒爭名翛然一種自機



軸驚倒范寬并李成昔者吾嘗閱畫史真蹟人間嗟見此臥游  
佳境不逢人但覺寒光浮棊几古樹枝摧瞰急湍雪嶺更從人  
面起全卿藏此凡兩幅持一贈我分片玉曾是平生好潔人挂  
處休將手頻觸

為楊起同題沈石田擬謝雪村山水

雪村已逝知幾年妙畫曾向吳中傳少時看畫老能憶此事還  
輸沈石田昨者西閭楊給事乘興放舟過相川坐間偶及雪村  
畫為言楊謝世有連石田呼童急展絹冉冉水石兼雲煙兩山  
秀色相對峙長松落礮聲隨泉禿翁觀泉不歸去豈是礮底尋  
詩篇石田作畫不賣錢給事得之真有緣墨痕斷爛稱古蹟莫  
上米家書畫船

為錢世恒題石田雪景

都下類江南暑氣一何酷錢卿適開筵羽扇不停撲忽然坐凌  
陰挂壁有長幅高峯樹玉幢空洞倚聖屋皚皚不可辨豈復分  
澗谷故家虞山陽昆湖真在目水榭何年成分明傍湖曲隔船  
人試問艤棹何所欲客云不干人聊借松下宿松樹數十株忍  
寒仍故綠對之恣披襟寒氣迫詩腹日暮暑未消持杯故相觸  
寄語石田翁此圖金莫贖

為毛貞甫題孫君澤山水

十日一水五日石古人畫筆殫精力後來簡澹亦天成披圖試  
看孫君澤山腰飛瀑千尺長懸厓老樹為山梁人間溽暑不可  
耐欲從二老乘新涼

又為題高房山山水

燕南蹙翠維房山高公昔者生其間戲拈畫筆少明豁玉女峯



亞垂煙髮積雨初收隔春樹望見人家鵑邊住亦知中有王維  
詩行到水窮無覓處

為杭人題畫

山水佳且近古杭猶未游開圖見所似畫手擅風流松林敞茅  
屋高士亦何求袒裼坐終日富貴如雲浮北嶺可杖策西湖宜  
泛舟他時挂冠去終與杭人謀

和楊應寧次陶韻止酒

孔門好學人謂未見其止竊嘗聞斯言乃在魯論裏未止以止  
學善學顏氏子惟彼旨哉味入口顧不喜嗟孰為厲階爰自杜  
康起紛紛嵇阮徒以醉自有理異世特相契兩醒屈與已柴桑  
雖任真空言亦邈矣茫茫涉大川此止未有淡詩史紀厥始惟  
十有三祀

夏日園中小適二首

藤蔓紅稀棗葉青欲迤新暑只登亭夕陽西去清陰滿閒向籬  
根拾鶴翎

荷錢初放亂浮萍却有新條結翠屏幾日小園無雨到莫齟池  
水入花甕

次韻鳴治病中二首

北望成均對兩廂喜聞勿藥下危牀問奇客至如揚子求益人  
多異互鄉半月不因陪祭懶十年惟有著書忙時人欲識高賢  
意道體字今用亦藏

不見高賢歲又重佳篇欲和愧難工過從未許仍隨衆予告緣  
知亦在公故里方山猶自好新年尊酒定誰同春風座上橫經  
處須信先生道未窮



雪園雜賦四首

因從塵市過始覺雪園清鶴蹟皆成字烏啼似語名石低叢竹  
倚架重古藤橫委巷無來客空餘酒滿罍

雪園何所有一望白皚皚已沒新開徑還堆舊築臺藥將槐角  
碾香以栢鈴煨偶憶前人事詩從鳳沼來

雪園何所得投我是瓊瑤把滑還循檻衝寒亦過橋空中真有  
絮盡裏豈無蕉掃去人何俗誰家擁樹腰

雪園何所樂筇杖日頻拖池涸無魚笱林空只鳥窠形慚珠玉  
穢家愛米鹽多禁體爭誇巧當時禁若何

寄壽陳朝用布政

款門憶昨駐肩輿別去深慚音信■壽域遙瞻三載後詩篇急  
補七旬餘閩南遺愛傳應徧洛下耆英會不踈娛老莫將他事

說麟兒把筆已能書

為奎姪題延香室

脩竹東連齋閣深篆煙長裊散輕陰客來如入芝蘭室佛語徒  
聞薜蘿林王氏佩囊猶俗態韋郎掃地只清心如何消受安閒  
福不是觀書定鼓琴

寄壽蕭文明七十家有晚榆堂

故人高隱在關東閩海歸時從兩僮甘蔗味佳初入境晚榆陰  
重已收功詩篇欲和多仍妙書法爭評老更工欲寄一尊為遠  
壽近來酒量與誰同

寄壽吳子高六十

吳門別後意常懸使到頻將手札傳汝老已當三壽始吾衰又  
在六年前步來委巷諸徒滿望取高科有子賢春酒一尊須共



飲欲從

明主乞歸田

匏翁家藏集卷第二十七

詩六十六首

春山圖

平野春雨過危峰殊秀發  
王女洗頭罷端如盤髻髮  
高人携筇行以畏溪橋滑  
結伴是何時松林閒採蕨

送戴員外出守桂林

子有長才早致身仕途隨處是通津  
六千里外桂林郡十五年  
前杏花苑人出守要知從古重作官  
何幸與民親昌黎亦羨登僊  
去詩裏騷鸞句尚新

送張光祿時達還南京

早入工曹績用成徊翔又作北都行  
長才未展猶閒地畱務能  
分已列卿言論高來通世故須眉蒼  
盡好風情傍人莫怪南歸



速春色遙追到石城

賀成國夫人胡氏七十

畫戟門深翠幙重北堂春酒色初濃江南秀山名臣裔天上榮  
加大國封僊籙載頒人跨鶴海圖親獻客乘龍百年將種能供  
養高廬長盈祿萬鍾

盆中桃花一本而緋碧二色

小圃喜多春色繁花一併斑斑紅霞映水將落白雪當牆可攀  
坐亂老人鬢髮行驚醉客容顏二喬臺上連臂不數唐家玉環

送王汝英南歸

尺疏陳情入舜宮 御批真喜徹重瞳銀臺異寵曾加秩金賈  
奇才屢奏功家食固知千指衆友懷皆說一心同銅官山色運  
如舊書錦煌煌在目中

送邵國賢

簿書錢穀歎徒勞提學俄聞出戶曹都下文名如子少江西學  
政是誰高爾書耀日懸霄漢驛舫乘風壓雪濤自古賓興先只  
行不將小技望賢豪

送白太傅致仕

玉敕新承墨未乾都門行色萬人看法曹屢奏三年績 恩旨  
重加一品官勝地扁舟行樂健故人尊酒過從歡不須更入香  
山去自有西園八節灘

送冢宰屠公致仕

皇朝出入著勤勞未老頭顱有二毛遷秩兼聞離憲府收功仍  
喜在銓曹天章笑捧新頒敕書錦榮披舊賜袍更向人間誇至  
樂登堂日日獻春醪



園中行讀白集

北齋坐後又西軒挾冊休將比兔園每託心情常託物已忘官  
職未忘言吳中故郡荒烟積洛下幽居宿草蕃老至一編空在  
手燕山畱滯媿高騫

新戶

新月如少女靜始凝晚粧亭亭朱樓上隱隱銀漢旁桂樹未全  
長玉兔在何方自然多思致何必滿容光黃昏延我坐檐下施  
胡牀遂爾成良會清風復吹裳願言常不負莫學吳興商

園中夜步

曳履孤亭側披襟小徑前藤垂風獨細樹隱月難圓散秩朝非  
懶閒居病易痊老年無著作只擬錄歸田

同年會予以病不赴簡席間諸公

新秋良會禁城西獨坐公堂未得躋二客預期非不速十人堪  
歎亦難齊情親只託詩筒送體弱誰將藥裹齋向晚涼生還坐  
想不知若箇醉如泥

送工部徐尚書以病乞歸加太子太保致仕

中外勤勞四十年平生晚節更能全身登八座官殊重名列三  
公位獨專 敕捧龍章天日近衣裁麟角海雲鮮肩輿日日何  
妨出故里看山有宿緣

送禮部徐尚書加太子太保致仕

玉帶橫腰喜氣新 賜歸爭看越精神史官早授為前輩  
聖主疇咨念老臣賜谷卜居真有地南宮增秩更何人亦知  
恩重難忘報夜夜山中禮北辰

送倫修撰文序父南還



萬里南來繫一舟綵衣春酒動離愁  
魁山黎水雖堪住赤縣神州也合游  
晚市緇塵仍觸暑月林清影忽驚秋  
朝家恩典三年事闕下親承願少畱

為毛憲清題花竹圖

憲清有祖百歲生於二月

繁花匝地凝春色脩竹凌空傲歲寒  
共向生辰呈秀麗偏于晚節報平安  
中朝有待賢孫至東海須將大老看  
白髮烏紗添入畫漢家恩詔定加官

送李世賢赴南京禮部侍郎

史局文場滯此身高才初喜試經綸  
東朝侍從踰三載南省追陪只二人  
雲起望家虞阜曉花開退食秣陵春  
都門醉別遙揮袂且脫京華眯目塵

題沈良德送行圖

不用高歌陟岵篇賜歸真慰母心懸  
翟冠自送雙笄總綵服重裁兩袖翩  
九世醫名多積德一門科第總稱賢  
吳中秋到慈闈啓盡說宜將盛事傳

翰林送李世賢

都門無計可畱公況是秋來有便風  
尚憶陸機游洛下莫疑張翰向江東  
詞林前輩晨星少鄉社無人海月空  
定有天書還召入暫將畱務託南宮

九日風雨二首

滿城風雨重陽日何處重登戲馬臺  
丹闕入朝衣盡濕玉堂置酒席難陪  
是日翰林設宴牆邊赤棗憐俱落籬下黃花恨未開  
安得吳門簑笠叟芙蓉江上送魚來

滿城風雨重陽日平地江湖大漲時  
木偶自漂應去遠麴生不



召故來遲人間紀事兼詩話座上傳神滿髻絲何物報晴真可  
喜喳喳鳴鵲在槐枝

早寢

老去貪眠負月華不知夜景到秋嘉疎篁倚石還搖影叢桂遮  
堂定着花吟就挑燈當別館夢回搗練是鄰家如何七十年將  
近猶踏朝門聽鼓擗

謝葉惟立送菊

園門歲晚只常關忽送幽花滿目斑天意故教秋色好世情不  
使物華閒臨風酌酒憐人老傍徑編籬恨地慳賴有疎篁為伴  
侶平生高節總難攀

送陳德修擢南京右都御史

百年京鎬設南臺門對鍾山紫翠堆畱務遠分承寵命舊豈重  
整見高才多冠戴向風前正鷁舫行從水際開便道過家誰不  
羨鄉人爭看錦衣回

送何道士授都紀還鎮江次沈石田韻

鶴馭雲中來北固霞裾塵外別東華名題金闕分僊袂蹟寄丹  
山離俗家鴻寶記長當吏牘玄都觀古即公衙天寒歸路清如  
許滕六前驅撒玉砂

藤梢

藤梢繞籬落黃葉照清池屬當秋氣盡欲落已先萎寒風既披  
拂微雪復點之坐見憔悴色不復如前時感之重歎息人老良  
可悲

雪後入朝

天門晴雪映朝冠步澁頻扶白玉闌為語後人須把滑正憂高



處不勝寒飢鳥隔苑應餐盡馴象當庭又踏殘莫向都人誇瑞  
兆近郊或恐有袁安

次韻韓貫道送濟之以冬至謁陵

公事驅人更莫辭亦知不是翰林時同行尚憶匆匆去暫別猶  
勞耿耿思百里向前瞻漢廟五陵依舊入唐詩年來喜識荆南  
面相送惟應少酒卮

謝濟之送橘次舊韻二首

味甘不用兩眉攢種得成林合棄官食後不將皮核棄扶衰

僊丹

嘉惠恭承又滿盤牛車雪滑到應難糖囊莫道名非稱入齒冰  
漿信不酸

又次韻謝送銀杏

綠葉叢叢鴨脚攢霜前摘取屬園官無花結實猶堪食羞殺花

玉是牡丹

王子纍纍走大盤老人手種食應難閩南橄欖形雖似待得回  
甘已受酸

楊應寧携畫冊過園居相示已而雪作

園居寂寞掩柴扉詩客從容出禁闈遙聽鶴聲初出迓頻瞻馬  
首莫言歸臨窗看畫忘呼酒據地圍爐試解衣寒氣逼人將日  
暮不知林下雪花飛

聖駕郊壇看牲次玉汝韻

天寒迎駕作郊行道院呼僮洗玉觥石鼎不逢狂道士銅爐還  
餉老門生投來濡肉祀無玷雜以枯魚鮓似鯖須是石湖風雪  
夜蓬窗吹火叙同盟



生日

人皆遇除夕我復臨生朝舉頭望七十前去三載遙信哉百年  
內行步為下橋早衰視茫茫面髮且蕭蕭安能如松柏歲寒還  
後凋衰頹固老態加以病相撓但勝陌上花易逐風沙飄所愧  
職業曠難免素餐嘲清秩徒兼授黃金自橫腰盤南開別業舊  
約負漁樵更念丘壠隔悲愴尤無聊孤燈對臥榻轉展至中宵

談命

有客能談命言予運正通運通亦何事爵位當日崇客言與吾  
意所見頗不同凡今登仕者命服華其躬人徒見其美  
入朝恒惴惴臨事惟忡忡官秩久益進職業愈難供王法  
或幸免清議安能容一朝奉身退憂患頓若空趨朝謝車馬睡  
足日頭紅田園日以涉山水任所窮出門無禁制開口無災凶

樂哉難具述林下始收功吾生果有命歸去在吳中

正月十二夜與鄉友會飲

繞簷星月帶明河佳節相逢有易過合郡幾人常減少流年如  
我獨加多畫屏重展銷銀蠟春酒爭持蕩碧波正是金吾初弛  
禁下堂休問夜如何

十五夜赴西涯飲

浙燈光起透藤絲偏與西堂雪月宜故事上元初放假新年三  
日預為期老人正爾思吳俗童子何堪唱楚詞醉後再傾紅粟  
酒情深渾忘出門遲

次韻李諭德生子志喜

紫禁朝回步雪中傳聞吉語信非空懸弧在戶鸞如月挂綵當  
筵爛若虹上日邀賓須歲滿中年為父豈途窮李年五十四如何識



此真堪喜我憶平生事頗同

為錢副郎世恩題桂兔圖

懸崖碧樹爭倒垂金釵亂插還參差古香能受秋風吹亦復有  
藤纒絡之洞門一似逢僊姬身纏寶璽墜朱綉其下何物趺坐  
危赤睛玉毫光陸離長耳聳起分兩岐視而孕焉醜是兒惟上  
有物揚清暉團團冰鏡一尺圍人名為月非此誰月中桂滿兔  
且肥信哉有影乃在斯歷觀畫記從新施收藏莫盛宣和時高  
格雅淡今何稀黃筌趙昌曷不師素面朝天誇號姨市娼塗抹  
衆所嗤驀然展觀亦甚奇翩翩五色斑斕衣

傅水部索石田玉洞桃花圖寄壽乃兄宗伯

傳說騎箕上天去傳巖于今在何處翠倚西江千仞高玉笥山  
前子孫住一溪流水漱雲根萬樹桃花遮洞門胡麻飯逐  
亂宛然此地武陵村主人自是青雲器去作玉皇香案吏不須  
手拍洪崖肩水部郎官是難弟勞書寄語山中人少遲歸來三  
百春妙手誰能移壽域分明只在人間世

盆中紅梅二首

盜裏孤根強屈蟠低枝老硬欲凌寒不隨桃李供人目顏色生  
來自渥丹

坐見荒園二月過莫瞻春色在喬柯分明一段江南景日暮頻  
將老眼摩

送汪太守致仕

吳學猶傳舊教條南來別駕路何遙上章忽入新報增秩仍  
為大府僚老去烏紗常在首閒來金帶已橫腰人生止足誰知  
得鄉里高名豈自邀



送楊太卿應寧赴南京

太卿樓船向何處直到石頭城下住江上人迎訪故盧堂前我  
憶瞻嘉樹南人只愛江南行江南樂多無宦情何如去家只百  
里黃金橫帶為清卿老我平生忝知己不得相從附船尾客居  
初沾燕子泥官河忽漲桃花水金陵本是帝王州高臺依舊鳳  
凰游知君到日好詩興佳句從今無李侯

齒痛

日者齒病作病起吾莫知知之亦甚易年老理固宜憶當七八  
歲正值毀齒時齒落乃復生如艸薙即滋今勢且欲落既落生  
無期又如枯樹然安能發新枝落亦不自愛獨何以痛為使彼  
無所痛盡落奚足悲夫豈若韓子計歲以數之何況舌自存而  
復食無虧吟聲雖函胡尚可和吹篴食物雖齧尚不廢

但使痛除去此外不求醫

輓毛伏羗

早持一劔策奇勲忠勇平生亦罕聞象應星辰通上將氣驅貔  
虎冠三軍捐軀報國懷方略進爵酬勞著誥文 當宁只今勞  
北顧誰今頗牧起丘墳

送史引之知隨州

儒者之餘事續言以為文古人嘗有言文章能潤身君昔在閩  
里誦習殊精勤浮俗志莫奪翩然曳儒紳稍長取鄉貢謙抑愈  
恂恂蹉跎二十年賢名只如新昨欲就常選懶看曲江春同輩  
爭勸畱顏色自欣欣入仕非一路期以澤吾民我志乃在此科  
甲真淺論銓試出緒餘冀馬竟空群楚邦非險遠民風更清淳  
宋賢讀書處遺蹟想應存此地物為守平生志方伸三年成美



政吾老猶當聞

送馬學士良佐還南京

院事清閒不下堂手披竹簡置銅章  
虞廷初考為三載馬氏重  
聞有五常官到鎬京  
諳異故地通岷水接家鄉  
南風又引扁舟去一振塵衣上鳳岡

送宋郎中出守廣信

水部才名滿數車向來相識自京華  
雲間接壤為鄰郡江右分  
符得過家旌旆微沾秋野雪  
桅檣高入晚汀霞親民長策今須  
展故里誰將書錦誇

園居二首

朝回當暑葛衣輕影過清池浴鳥驚  
種得玉延纔出土客來何  
物可為羨

靜處誰兼吏隱名名兼況有老儒生  
却憐一畝幽棲地百里吳  
山不會行

追和朱樂園先生蘇學士題有引

泮池

半形循學舍一水轉松林盛矣來多士  
依然廣德心跨橋方覺  
濶垂釣不知深此地名龍腦揚波願作霖

玲瓏石

奇特非常品來從建學前  
久為錢氏物中有洞庭天  
輕比瀆浮  
磬溫須玉出煙菱溪何足記想見狀頑然

百榦黃楊

巖凝霜雪後蕃衍弟兄同帖莫題青  
李刀難斷寸葱厄多逢歲  
閨材短謝良工桃李紛如許終看立下風



公堂槐

密葉連街上孤根寄學中名揚蘇子記陰覆魯侯宮既火今何在惟喬自不同曾沾時雨化多幸遇朱公

辛夷

莊周稱散木形狀獨離奇名在誰多識花開每及時鳥窺無可食虫蝕也須醫作筆應全誤紛紛落研池一名木筆

石楠

泮水根常漑臨池路不遙顧瞻依曲檻愛護障輕綃別種為交讓香楠為木終年亦後凋有材非爨用斤斧免山樵

多榦栢

新甫傳遺種吳門見後昆碧霄多直榦黃壤未同根霜雪持高節莓苔接古痕三年非椹木十畝自陰繁

竝秀檜

講堂前竝立霜雪傲玄冥此樹今猶在常年不改青兩來添秀色風動散微馨科第能相繼題名下有亭

新杉

生為松柏類不逐歲寒凋弱質蒙春雨高情薄紫霄諸生活賸馥巧匠待長條此日材當大初栽自宋朝

泮山

少小游歌地升堂步未窮移山元費力覆篲竟成功狹徑埋芳艸孤亭納暑風登高誇壯麗興學念文翁

蘇自宋有學景祐初范文正公來典鄉郡延安定胡先生為師繼之者為樂圃朱先生公既名臣二先生又良師皆一時人才造就遂盛于天下學故吳越錢氏南園也規制宏壯遠



去市井山水之勝嘉樹奇石錯植其間宛然林壑也舊有十  
題曰泮池玲瓏石百榦黃楊公堂槐辛夷石楠龍頭檜蘸水  
檜鼎足松雙桐至樂園掌教時已亡其四先生乃益以多榦  
栢竝秀檜新杉泮山而十題復完今去當時已數百年獨泮  
池泮山尚在而講堂前二檜疑即竝秀若奇石固有不知其  
孰為玲瓏也寬為童子入學固不知十題之名獨見 國朝  
士大夫詠學中諸景詩石刻然皆非十題之舊矣比寬自在  
都再入翰林專掌 誥敕暇日得閱秘書而樂園集在焉見  
十題之作而先生自叙其前尤詳乃悉次其韻一過夫今之  
學遭賢郡守屢加興修規制益勝然所謂諸景又亡其三四  
矣況數百年以前者乎故旣和其詩復序其事庶其物雖亡  
而其名猶存後世亦有考焉爾辛酉五月旣望序

看在大卿題史都憲墨竹

容臺有地堪種竹北土高寒數根足未許長竿可釣魚況云美  
筍能麕肉太卿好竹如好僊夜夢時時游渭川醒來忽見竹滿  
壁墨痕溼處何蒼然彷彿庭前秋月白影落旁枝猶百尺化龍  
只恐起清波棲鳳却疑依巨石人間酷暑何時徂對此條然暑  
氣無伊誰能事寫此圖人云中臺史大夫

為錢僉憲題二士圖

二翁吾不知為誰晚來共坐崖石危一翁攘臂方談詩一翁抱  
膝如有思平湖萬頃渺風漪隔岸蒼山脚下垂巖姿樹色望忽  
斷正是白雲初起時吳中山水正如此震澤洞庭天下奇更教  
此地看明月萬鍾千駟將何為我欲徒步往從之只恐二翁嫌  
我是俗客塵衣不使汗崖石



題石田畫卷寄沈時陽

松林畫靜人獨行  
隔林似聽吾伊聲  
春山滿眼發蒼潤  
知是曉來初雨晴  
南望荆溪溪上路  
路繞長松千萬樹  
太湖蕩漾映高門  
此是荆溪長往處  
何人能棄冠裳歸  
只向松陰覓詩句  
便欲從之未有期  
清夢時時此中去  
石田高士臥東林  
故寫長圖慰我心  
封題却附湖船上  
只恐雲深無處尋

鮑翁家藏集卷第二十七

鮑翁家藏集卷第二十八

詩八十七首

題謝鳴治歸來園

三畝新開山下園  
古村纔得數家存  
經心勞止多閒事  
遺腹蘄然有長孫  
栗里一尊常自滿  
陶淵明作歸去來 晁家千首更須溫  
晁以道號 主人莫作終焉計  
召命臨門敢負恩

次前韻懷故園

老夫亦自有東園  
因賦歸來若目存  
久負木鐺歌杜子  
何妨布被笑公孫  
別來漸覺清風遠  
坐處常思白石溫  
便逐秋波放舟去  
時人莫漫笑忘恩

鳴治新修國學朝房雨夜宿此有作次韻

笑揮公帑百金餘  
輪奐驚看勝舊居  
一日葺來猶故事  
兩山占



斷豈吾廬鳴治家有兩山書院夜中風雨題詩滿天上星河待漏初廣廈  
仍思庇寒士先生才調未全疎

久借內閣朝房次前韻

詞林再入歲周餘自笑東房久借居漢代雖多閒祿秩吳門幸  
有舊田廬高眠齋榻春回後慣着朝衣日出初天念老人仍借  
景隔牆嘉樹綠扶疎

寄壽太宰尹公八十有序

恭惟太宰尹公天下達尊濟南遺老寬辱愛頗久奉  
問獨踈徒因微末之嫌恐致率易之誚幸 三朝之  
耆舊功業既成屬八表之高年體履益勝聊陳韻語  
因寄下懷敬祝期願以慰衆望

廊廟久違思舊德山林何幸着名卿臨湖對月將杯舉出郭看  
花却杖行楊綰在朝風俗美山濤典選品流清濟南耆俊從來  
有坐見高年過伏生

盆荷初開適值風雨對之感歎

一面紅粧擁翠盤風風雨雨不勝寒園門半掩無人到我獨憐  
渠只自看

代荷花答

淡紅數瓣出天然根託盆池強自連風雨滿園香更遠無人來  
看不須憐

園中即景二首

竹陰日暮意翛然山石依依共晚年白槿數枝相映好似將顏  
色弄清妍

萍藻多從雨後生綠波常共小池平朱藤覆滿休輕剪待看繁



花映水明

雨後移竹

人言種竹須雨過何況移來雨仍大此君此日館吾家攜酒客  
來爭作賀早年憶與竹相親到此頻栽凡百箇晨澆暮灌常不  
活猶怪園丁何懶惰其密如篔簹今兩叢東鄰分得肩難荷長纜  
依然白木柄手種任爲泥所泥虛亭掩映翠色新使我對之終  
日坐簷前有地繞丈餘覆以清陰誰敢唾尋常豈乏涼颼生日  
午風清俄遠播歐公曾云涼竹簾酷暑可逃當此臥頗似吳中  
顧辟疆獨許獻之登上座望塵不作金谷趨高節應甘首陽餓  
平生何故取於斯正爲冰霜莫能挫京都百物皆有之自笑當  
居此奇貨敲門只恐人借看林下蒼苔輕踏破從今艸木俱等  
閒當以竹題爲日課試將竹榜揭園居客到先將此篇印

園北新構板屋制甚樸陋濟之有作次韻答之

古詩載板屋遺制千載下嗟我同心人在其是誰者江南想猶  
無都下知更寡匠巧免刻楹童頑難毀瓦中虛亦生白外美聊  
飾赭夜宿惟僊禽朝奔無野馬葦席平可眠荆墩矮宜坐緣木  
構巢避風停扁舸困困疑乃倉渠渠愧非夏雨漏痕在壁月  
窺光落筆仍勞詩家詠不待畫工寫其如功省何從此價增也

濟之再和復次韻

退食初自公我常在其下凡此連牆居孰是無椽者價直旣甚  
廉規模亦殊寡成風勞運斤禦雨謝陶瓦農家費索綯甲第自  
塗赭似巢宜借鳩非旣休畜馬打頭忽欠伸結趺從起坐車停  
難傾蓋柁捩莫旋舸向陽緣度冬當暑却忘夏負暄兼看書臨  
水還洗筆倘有王維來當爲魏野寫景勝實類之言大非誇也



家範集卷二十六  
濟之三和復次韻

古人為宮室棟上而宇下異哉方舟如吾豈作備者萬間與一  
屢勿復論多寡暖日忽上階烈風免飄瓦維此湘山材曾遭始  
皇赭公來價十倍伯樂同相馬舉杯更相屬試說再延坐敝巷  
舊得名居民業折舸近市物預儲爰自去年夏辛勤始有此豈  
易陳一竿病體強棲遲中抱聊自寫樸陋何足誇前言真戲也  
偶閱白集有東園玩菊之作今歲小園菊開頗盛輒復

次韻

今歲置秋閨又見秋將闌客居貯秋色幸復有東園凡今百種  
花孰不畏天寒胡此爛斑者節去猶未殘瓦盆圍板屋每坐于  
其間玉毬既高隊金錢更相連東籬偶采菊不為花所牽豈如  
陶翁高見山獨悠然我欲學此翁無菊非所難翁如欲學我無

酒却鮮歡園有松與竹秀色同新鮮呼之作三友庶以怡衰顏

有感效白體

吾秩殊不卑已作三品官吾壽亦不少已望七十年官卑何足  
計壽少真可憐不見一達者軀幹如丘山昨朝猶啖肉今夕俄  
奄然官高亦何用有壽差直錢從此心所願仰面惟籲天官乞  
常落後壽乞常向前更乞早還鄉不待步履艱放舟日臨水策  
杖日登山筋力幸強健何必駕高轅此願如我遂俸祿皆等閒

雪中對竹

平生此君子夙好似相敦昨乘暑雨過移種向東園眾木經秋  
落黃葉亦無存獨此瘦骨爾日午陰猶繁天公故歷試夜來雪  
翻翻雪落洗其葉雪消漑其根顏色愈覺好青青映園門高節  
默自持難與俗人言



板屋二適

負暄

朝坐見日升夕坐見日落午坐日更多煖氣如火灼陋居類田  
家不省在城郭高樹凡數株黃葉被霜搏何曾遮陽烏更復聚  
寒雀旁不啓窗扉前不垂帳幕炙背真可獻此語非善謔昌黎  
却避景遷坐身屢作我幸無此勞竟日不展脚自我有此居綿  
裘不重着自我有此居火爐但高閣冬日何可愛可愛更可樂

對雪

大方本無隅虛室自生白吾屋初落成老莊言不易白也從何  
生有物皚皚積空園何所見怪石惟露脊誰寫偃竹圖須帶鶴  
在側平鋪得奇觀寒氣亦漸逼展席坐稍深蒲團閣雙腋旁無  
一木支上止片板隔端愁厚將壓却喜輕似擲階踏鳳沼詩案

堆兔園策鄙性自不飲泥甕久不垢淨掃但烹茶此樂更甚適

送陸全卿赴浙江副使

多角冠高映赤墀衆中才操許誰知人登臺省誇何易子去江  
湖恨不遲親舍相望通色養臬司爭喜觀風儀春來獨覺門牆  
冷老大空搔兩鬢絲

送羅編修擢南監司業

舟引薰風好筭程江頭立候總諸生一章再補賢闕缺六館先  
期士類成路入石城瞻虎踞山臨壁水聽雞鳴曾聞南國游歌  
慣不厭長街振鐸聲

答鳴治乞花二首

北牖新開忽好奇庭中艸木最相宜誰知小圃春風後只有酴  
醾三兩枝



池上朱藤總着花，飛虫繞屋類蜂衙。何如枉却公來賞，況有新醅不用賒。

再答鳴治乞花不得二首

新暑蒸人屬夏初，恨無花送強分疏。朝來北牖多生意，想見庭前艸不除。

城北相望見面遲，只將新句乞花枝。花枝乞得成何用，自是堯夫要作詩。

待鳴治過園居

西街何處踏黃沙，未午空驚樹影斜。掃地頻教除短徑，臨風獨坐數飛花。行來雙闕應相近，望入群山幸不遮。自笑貧居無款曲，只呼童子預烹茶。

鳴治至次前韻

空庭雨後少塵沙，委巷迢迢轍蹟斜。休沐有期能致客，借看何處更移花。綠陰覆地禽相語，清水盈池樹半遮。四月江南無使到，宿醅聊可當新茶。

送吳克溫赴南京翰林

綸閣花香日影浮，薦章爭喜得名流。虞書初進東宮講，唐典猶從北館修。家慶及時開壽域，官清盡日在瀛洲。安能便趁僊舟去，南望金陵是舊游。

聞家園樹為去歲風雪凍死

我家冬青樹百株，先子手種東莊上。年深鬱鬱丈餘高，能與東莊作屏障。我家木犀樹兩株，亦復團團高丈餘。少時我種東園裏，猶憶此地稱山居。嘉樹我生好怡悅，家僮寄書來報說。園林遭厄家家同，去歲何期大風雪。冬青根遠猶且瘁，木犀葉落仍



不發其餘橘柚與篁竹畏冷固宜難盡活吳中三月春已殘生  
意蕭條如十月嗟哉氣候何如斯老人自言未見之樹埋厚土  
裹以皮凍死尚作枯柴枝東南民力盡徭役無衣無褐死可知  
安得麤布數萬疋盡為此輩遮羸肌傷心偶賦凍樹詩詩成敢  
告良有司

得仲山德州所發書云去京師陸行只三程恨不能一  
見是夜園居對月悵然成詠

使車停處發郵筒消息年來喜易通疋馬三程岐路近兩人千  
里月明同園名屢易常為主酒量難添已作翁信是無由能縮  
地歸歟須約故山中

園居續詠

藤障

步當斜徑綠成圍賴有長藤葉不稀不恨刺藤枯朽盡回來行  
處慣鈎衣

花門

新開小徑傍西垣手種酴醾花已繁不似陶翁園日涉門雖設  
處却開門

榆籬

不勞細竹倩人編亂插榆秧犬莫穿坐待兒童爭采食高枝春  
盡欲生錢

艸徑

翠繁綠縹不知名石甃中分一徑行行處莫言人蹟少青苔踏  
破不曾生

藤屏



長條抽綠綴紅雲園子新從雨後分板屋向南將樹塞莫譏管  
氏凝邦君

樹屋

凝凝光浮葉蔽空舉頭惟有碧雲蒙夜來雨漏牽蘿補巧者安  
能復食功

晝聞鬼車

五月廿七日陰雨中

古燕氣候異陰雨近何多惡鳥啾啾鳴高飛形么麼夜鳴已可  
怪晝出當如何爾亦豈虛出出必事無他鵲鴿載常棣鳳凰見  
卷阿歐公詠鬼車可作安可歌弋人亦慕此將謂是鴛鴦獲之  
可以獻野外欲張羅

送李郎中擢應天府丞

名堂嘗辭傳奉之命故有此擢

清班綴立色無慚工署徊翔意自堪名屬山公終啓事身從韓

子不臺參舊開輔郡依江左遙望神京傍斗南壯歲要知功業  
盛看君黑髮正勝簪

自六月初七夜乘涼看月後每夜有月輒賦一首

此夜看新月亭亭正向西光因藤蔓少影與竹梢低千里誰同  
賞三更我再題明年相見處約在越來溪

初八夜

此夜仍看月清光稍見多兎豪纔閃爍桂樹漸婆娑還傍西樓  
隱應從北闕過坐來人負看久更問夜如何

初九夜

此夜仍看月人云是上弦彤弓三尺直青鏡一規圓光借無全  
日疆分豈半天幽都近遼海始覺地形偏

初十夜



此夜仍看月陰雲未撥開還教童子侍如待故人來多病須靈藥常醒只耻疊清光不相負依舊滿書臺

十一夜

此夜仍看月黃昏始正中樹多增目睫天濶蕩心胸暗室明於書銀河淡若空爽然消暑氣身到廣寒宮

十二夜

此夜仍看月胡牀坐稍偏清風還共至良夜未須眠庭際懷丹桂池中見白蓮平生無所好對此輒欣然

十四夜

此夜仍看月看時却向東影懸真載魄光暈類重瞳偶值青林缺還當玉宇空何須論詩識范老句偏工

十五夜

此夜仍看月真從海上生金盤承露濕玉鑑掃塵清詩句憑誰和菴居為此名人心當自識天道豈常盈

三姊壽七十以八月十三日生因題月兔圖奉賀

橋頭水滿月流輝設悅高堂映綵衣節賀中秋今已近壽期百歲古尤稀門闌舊傍金獅壯宅在金獅巷北圖畫新成玉兔肥小弟相看俱老矣願為煮粥正懷歸

為陳玉汝題啓南山水大幅

馬家作畫纔一角剩水殘山氣蕭索畫苑馳名直至今輸與毫端不浮弱此幅壯哉誰寫真吳西山水見全身行春橋上曾逢望待樂亭中好細論

鳴治種荷無花見予所種亦同有作次韻三首

幸免花開重賞花近來多病早休衙高荷亦自知人意盆底移



花過別家

翠蓋亭亭已早枯紅衣點點定西湖試看一勺盆池水此日無花也合無

野花次第隔籬開不待園丁着意栽莫向濂溪論氣韻還輸康節識根荄

老病二首

七十嗟無幾難教病不生已孤君相意莫慰友朋情晝寢安

逃罪朝吟久絕聲吾衰忽如此更苦入朝行  
數日冠裳解依然一老生看花無目力養鶴少心情夜月勞延坐秋風感作聲近來添老景腰痛況難行

奕姪構二亭于東莊一在振衣岡名看雲二在曲池旁名臨渚以書來報待余歸休與諸老同游喜而寄此

爾父西菴扁拙修當峯種樹帶平疇近聞肯構為吾計有待歸休與客游山上看雲依鶴峒園中臨渚對桑洲只憂步履非輕健更欲池邊置小舟

病臥王延亭

高臥真如隱士閒病來受用未為慳平池積水從消長盡日清風自往還短杖好扶宜野步小冠初着稱衰顏直須歸到吳城下新構幽亭況兩間

謝朱懋恭同年寄龍井茶

諫議書來印不斜忽驚入手是春芽惜無一斛虎丘水煮盡二斤龍井茶顧渚品高知已退建溪名重恐難加飲餘為比公清苦風味依然在齒牙

題墨竹贈李尚書時雍赴南京二首



司空德望重同袍直自黃門到戶曹總道南都優老地更看晚節傲霜高

三十餘年契義心白頭相與戴朝簪南行翻喜清風近來歲吳門候好音

王延亭晚坐

殘暑酷憐何處同只將河朔比江東半規新月未全白一穗幽花仍澹紅鶴步臨池應愛水蜩鳴抱樹似呼風客來只勸秋涼出無病無官豈邵翁

惜月效白體

入夜見何物既圓且復平空懸無所繫忽從東海生以彼比金盆金盆無此明以彼比寶鏡寶鏡無此清所恨容易缺每憂不常盈況復當盈時或不值天晴又爲日薄蝕仍被雲縱橫陰晦時每多清明能幾更所以尤愛惜對此難忘情我欲告上天高高鑿微誠天有日與月譬如兩目睛使夜或無此天目一已盲盡掃諸浮翳一旦驅天兵不論晦朔夜常從天上行當令仰見者無不騰歡聲

有感

唧唧蛩鳴夜喔喔雞鳴旦惕然發深省二物如相喚茫茫開闢來一元過強半人身與浮沉世道分治亂吾生處其間一息真可歎寸心冀無忤此外奚足筭

送張濟民擢知思南

豫章已作甘棠詠潞渚初從貴竹行萬里思南稱上郡寸心拱北望神京緋袍金帶娛慈母皂蓋朱旛候遠氓他日漢家循吏傳虛名應不比王成



新製方竹杖

紫玉新裁恰過肩  
斑斑四面帶湘煙  
病軀藉爾能扶直  
巧手煩渠莫削圓  
世事固知方則止  
時人應道曲能全  
此生得免模稜  
諛晚節相依尚挺然

夜坐聞砧

何處疎砧隔短牆  
東鄰有婦搗衣裳  
風林落葉秋聲動  
露草鳴蛩夜氣涼  
久別官寮忘館閣  
每從兒子話家鄉  
強扶筇竹歸深院  
半壁殘燈獨上牀

中秋風雨

都人期賞月  
此夜合家歡  
市上人爭送  
豆瓜堆滿盤  
那知風雨至  
失却此團團  
天公亦戲人  
人情苦多端  
陰晴詎可定  
感此發長歎

和石田題王濬之畫扇二首

尺圖宛見狄溪春  
我昔經行記得真  
欲作畫評重閣筆  
只今還屬當行人

紫藤花落石臺春  
隱者幽居寫最真  
畫品平生應自定  
何須延譽待他人

病中讀周益公集以術家謂其身坐磨蝎宮宜退不宜進  
寬命與公偶同所愧名賢德望不及遠甚其退尤宜  
因詩紀之二首

術家早已論身宮  
淺薄安能比益公  
止豈人爲當有命  
退如時序況無功  
過從却愧高車滿  
請乞惟憂短疏空  
忽報南方風雨甚  
病懷猶自望年豐

益公論命居磨蝎  
歐子作詩思潁州  
合志不須分後學  
乞身將



復顧先憂買田負郭甘供稅種樹臨溪擬泊舟更欲范村從一  
老月中常作石湖游

詠荆墩

錯節盤根地底埋野人發地作枯柴製來礪硯俄登席送到蹠  
跚忽上階曲几異形休用斬胡牀同類亦教排識荆已遂平生  
願隅坐相依稱小齋

詠胡牀

座上斜撐三尺牀病軀隨意與低昂睡來有枕還成夢不用鳥  
皮作隱囊

煮栗粥

腰痛人言食栗強齒牙誰信栗尤妨慢熬細切和新米即是前  
人栗粥方

讀韓文公瀧吏詩

自古東吳游宦鄉愁聽瀧吏比潮陽蘇公亦是南遷者長作嶺  
南人不妨

招曹良金飯

曹君履屐憂顏色何欣如學道想有得委命心常舒屬以公事  
至翛然寄僧居行裝止詩卷一僕身與俱西城隔風雨遙念夜  
堂虛自剔長明燈開函看佛書寒予負老病秋至歎歸歟坐上  
無清言何人能慰予明須就我飯已摘園中蔬

題墨竹贈良金還東昌

此日此君何所往聊城聊避洛京塵清風到處難移節好雨來  
時更潤身

九月十八日大雪又十日雪益大作秋雪歎



吾生本江南不慣見秋雪見之自北都都人亦不說初偕雨兼  
寒忽逐風急刮漸看瓦溝平仍畏石城滑陡然作寒威貧家執  
難活米炭幾時儲糞壚何處幹以至褻曲身況也無衣褐病體  
強自支憂世亦頗切茲事已兩見浹旬未遼闊月令不深考政  
事何所缺惟天量有容陽氣終奮發赤日中天行窮簷徧昭晰  
涼颼只淒然勿遽變凜冽霏霏嘉瑞成却待嘉平節

次韻濟之齋居苦雨

病臥三月餘幽憂滿懷積索居當杪秋夏為雨聲迫淙淙瀉空  
階豈但作點滴緬懷同心人恨不坐連席齋居掩公署紀異稽  
史籍向來明月共數步東巷隔及此遙相望南箕與東壁寄示  
苦雨篇此意吾已識黃葉濕還飛穿窗破愁寂

韓貫道示所和復次韻答之

宿禽噪無語落葉紛欲積入夜雨不休愁思為促迫作詩寫幽  
懷累留空研滴嗟公文鰥居所恨誰暖席夜長如僧齋名但挂  
朝籍坐念西署清遙如千里隔闌風仍送雨夢覺聲撼壁垂頭  
坐牀下童子何知識八荒同一雲杜老感幽寂

送楊溫甫郎中出守杭州

刑曹已脫簿書忙劇郡新除又古杭雪後遠郊驅五馬川中名  
族數諸楊白公石在官初滿蘇子堤成姓共長莫信一麾俄出  
守前賢遺愛自黃堂

竹田東莊諸景中之一也長姪奎取以為號使來請一  
言予喜其不忘舊業也賦近體一章遺之

斷橋流水接村墟中有脩篁一畝餘附郭久為先世業築塲宜  
共此君居斲萌不斷畱嘉種結實能收助宿儲幸免輸租同歲



晚子孫常願把犁鉏

杜東原畫為齋姪題

溪上悠悠西日沉  
炊煙生處萬山陰  
試看畫筆隨人老  
此幅吳中何處尋

又為題沈石田畫

高峯玉立勢亭亭  
石罅長松數寸青  
儒雅堂中還講業  
案頭終日對遺經

夏太常墨竹卷為楊郎中題

友石山人去不還  
派傳墨竹在崑山  
長身迥出雲煙外  
疎影平分水石間  
管列笙竽陳雅樂  
聲回環珮入清班  
此君此日常相見  
種處從今手可芟

紀賜十一月八日

東宮輟講內山衣帶徧賜官寮皆加一等寬得雲鶴衣三犀帶一愧感之餘以詩

託之

中官高捧出彤闈  
詔賜官寮帶與衣  
雲鶴豈勝鸞背着  
花犀仍向病腰圍  
受來臣職將何補  
持出君恩不可違  
章服在躬元不稱  
平生加等復何祈

楊惟立以南京吏部考績至京留修會典書成觀卷首與予聯名有詩志喜次韻答之

令甲紛然合百司  
校讎何幸得同時  
北門再作冠裳會  
東觀常將筆研隨  
漢祖三章垂約法  
唐人六典費精思  
煌煌一代新編上  
名在盧前愧莫辭

又次韻惟立奉天殿進會典時十二月十一日

緗帙裝成進御初  
綵輿僊樂下東除  
史家未許依唐典  
冊府空聞紀宋書  
陛楯夾陳雲氣繞  
殿簾高捲日華舒  
子雲筆底多清



興欲和新篇恨不如

又次韻進會典明日賜宴禮部

喜動龍顏覩巨編禮曹開宴特傳宣 祖宗政令侔三代文

武公卿合一筵遷史僅終天漢事周詩宜有鹿鳴篇玉堂歲莫  
多嘉話烏帽宮花席更聯

次韻鳴治歲暮有感

石湖住近萬株梅買得湖田苦未回都市每驚風俗改老人偏  
覺歲時催客居顧我聊兼隱仕路憐渠更用媒頭白相看已  
在方山竚立勢難頽

匏翁家藏集卷第二十八

匏翁家藏集卷第二十九

詩三十七首

癸亥正月九日以張廷式工部自易州分司來初作同  
年會于李時器宅時器出松竹梅干盞云歲寒三友人  
各以一物自擬復相倡和

京國重臨十日春同年寥落是壬辰合成松竹梅三友歷盡冰  
霜雪一身談劇欲更庭下僕飲餘不醉座中人白頭却歎吾偏  
老坐對杯盤意轉親 三人皆不飲

十四日再會于家

雅會新年喜再成過門冠蓋見交情深穿委巷春風暖高出疎  
林海月清唐國太康原有戒齊人同好不重盟歲寒高節真堪  
取三友相看骨負名



二十日三會廷式公館館即楊文敏公朝房所謂聚奎堂也

積雪全消春載陽上元已過日初長城中燈假何妨滿社裏詩盟不可忘三友自成聞喜宴五星猶仰聚奎堂明朝易水遙相望強向筵前更舉觴

擬松

朽株千尺傍林臯縱受寒風不怒號老去竹梅長作伴春來桤李獨分曹材充清廟難為棟賦就中山且作醪今日會中邀入會百年高節願同高

和廷式擬竹

翠幹青枝玉削成倏然誰識此君情根盤澗澗鄱山遠影帶蕭蕭易水清兩潤何妨還改色歲寒能保不渝盟枯松幸託同心

久相會無勞問姓名

和時器擬梅

冰雪生香畫未成相看綽約更多情竹君比玉姿借美松老如柴骨不清詩說逋僊甘獨隱譜修范叟愛同盟從來能作和羹用早向商書已識名

絕飲

平生不能飲常愛能飲人三杯已至醉陶然見天真淺飲分數酌夕宴可自晨流連至終席尚可陪嘉賓近者患齒痛痛處益有因酒入咽喉間其氣烈且辛遂令痛作時難合上下齟齬乃天美祿分定于人身天欲絕吾飲何必言諄諄惟令痛及齒不使沾其唇空庭滿冰雪寒氣加新春對酒不能飲天意豈不仁不為酒所困庶免書諸紳



聞雞

繁星滿春空雞鳴鳴不已試問鳴何為意在喚人起攬衣不能  
眠人各勤所事士人爭入朝商人爭入市惟有怠惰人翻嫌聲  
聒耳殺其善鳴者入庖執刀七雄鷄職司晨不與牝雞似牝雞  
鳴聲低豈識司晨理不知家之索顧以聲可喜枕上偶聞雞感  
歎為流涕

新歲與王汝世賢禹疇濟之為五同會王汝以詩邀飲

因次韻時王汝初治楚獄還

朝班常喜接鴛行東髮同游自故鄉獄事不冤如定國歸途無  
險勝王陽三江已隔非吾土五老安知共此堂更待城東春色  
好小園還約看紅芳

書室曉坐

南窗兀坐日光浮殘雪猶看瓦溝畏冷又過冬一難覺衰真  
合古三休使人強以家書附多事閒將日曆修喜報  
聖躬膺萬福南郊擬從六龍游

二月四日 上出視朝志喜

鳳樓高隱五雲端鍾鼓聲傳列奉鑾世道已登三代盛  
聖躬常繫萬方安殿前旭日天仍近仗外春風樹不寒仰見赭  
袍陞黼座千官擁笏盡騰歡是日百官皆具公服朝見

次韻鳴治見懷

層軒孤榻在此地豈吾廬星彩三更滿風威二月初河冰清灑  
灑宮柳翠疎疎詩自昌黎後惟公更押於

郊祀與楊惟立寓宿神樂觀馬道士房翰林前輩多於此齋宿

倦房地迫步頻移影澹西窗落暝遲舊日諸公無在者新年老



友更同誰坐深蠟炬當筵剪聽徹鸞笙隔屋吹便欲聯名題壁  
上郊齋須記仲春時

日煖齋宮賜食頻曲廊連步得根津卜郊此日非三望陪祀誰

家有四人楊氏有惟立及大理卿守隨兵部郎中守禹刑部郎中茂仁四人陪祀展卷鑿書誇茂

密惟立携宋仲開函投句愛清新是日李世賢屠元憶從史局

曾相別却向僊房得更親

### 次韻屠元勳陪祀

南郊春半喜新晴盛禮初從改卜行刑獄仍令司寇禁祝詞先

許奉常更改時維仲春陽氣發酒傾玉瓊分三獻樂奏蕭韶入九成衰

病不堪陪祀列仰瞻袍笏羨允榮

### 送王汝擢副都御史仍赴南京

南都人識舊清風新命仍歸王敕中執法星高依斗北雷臺地

重隔江東睢陽會散誰偏老洛下吟成我未工欲忘離情須是

醉當筵休放酒杯空

園中一鶴長鳴群鳥時噪其旁若相語然因觀白集有

烏鶴贈答之作輒效其製為四絕或者能道其意非特

所謂自取笑也

### 烏問鶴

爾脛雖高不上天爾軀雖大却枵然小園半畝門常掩獨舞孤

鳴待幾年

### 鶴答烏

結巢長比鳳如鶴阿閣雖高性不貪試待明年毛羽長一飛直

到大江南

### 鶴問烏



緇裳玄覽不分明  
聒耳爭嫌攫攫聲  
爾自上林能攫食  
如何來此欲通名

烏答鶴

飽食橫飛不願餘  
彈來能避翼  
能舒終年只向空  
囿住不會謀身不似渠

謝馮副郎送惠山泉

何處泉滿腹  
惠山橫翠屏  
山遠不能移  
誰移此泓渟  
客從山下來  
遺我泉兩瓶  
磊磊石子在中  
涵數峯青  
宛如清曉汲  
尚帶魚龍腥  
煎茶水有記  
陸羽著茶經  
舌端辨清濁  
豈但如渭涇  
茲泉列第二  
不甘讓中泠  
幸蒙蘇子詠  
將詩作泉銘  
至今山游者  
爭仰漪瀾亭  
遠餉踰千里  
說覲載吳舫  
後人不好事  
此事久已停  
大甕封泥頭  
所重惟醯醢  
一朝俄得此  
高屋驚建瓴  
陽羨茶適

至新品攢寸莛  
雖非龍鳳團  
勝出蔡與丁  
二物偶相值  
活火仍熒熒  
蟹眼泡漸起  
羊腸車可聽  
煎烹既如法  
傾瀉散蘭馨  
連飲渴頓解  
更使塵目醒  
餅底有餘瀝  
照見髮星星  
嗟此一段奇  
何意當衰齡  
不須茶始飲  
飲水心常惺  
未足酬雅意  
聊用報山靈

題西戎獻馬圖贈楊應寧都憲督理陝西馬政

烏駝曉度黃河來  
蹴踏萬里風沙開  
四蹄垂鍊不可鑿  
拳毛繞腹非凡材  
戎人牽過蕭關下  
毳衣氊帽胡爲者  
不辭馳獻到關西  
聞道楊公來主馬  
平涼極望水艸新  
監苑重開列國人  
此疋真爲渥洼種  
隱起龍文猶滿身  
馬復令行如詔旨  
蕃恩應看錦雲比  
唐家莫說惟毛仲  
秦世徒傳有非子  
內地養馬連長槽  
料水莖艸民何勞  
楊公一來壯兵氣  
萬騎逐北天山高  
羯胡夜撤穹廬遁  
馬政既成公入覲  
還將此疋獻天閑  
不是按圖空索駿



應寧示贈行諸作題其後

溽暑不可耐三伏且未闌琳館遙相望出門一何難況也值連  
雨道上不曾乾雨多亦自喜客去幸盤桓試看何所得詩卷滿  
牀攤西行良足慰躍馬過長安仰瞻太華峯俯挹黃河湍駉牝  
散郊野監牧紛奚官嚴霜被百艸邊城驚早寒懷人當不寐明  
月中宵看

題米南宮詩墨 靳充道藏

向晚得奇觀案有翰墨陳展卷即可辨迥然出風塵尋常勢欹  
側此幅殊不倫字止五十六端人似垂紳復如旗正正又若車  
麟麟書家有定論俗士妄生嗔不見蘇公語超妙仍入神公昔  
家京口海嶽近為鄰墨蹟多散落至寶終難埋壁畫彼荆山玉旁  
達見孚尹驚看忽入手幸矣歸鄉人百世恐朽敝摹勒須堅岷

銘文配瘞鶴終古焦山垠

為潘時用博士寄壽其叔父鶴溪太守八十

閩南歸老二十年鶴溪先生健如前却杖散步登山巔上下與  
鶴同蹠蹻眼明不著養生編試問先生何以然口碑曾聽閩人  
傳有守以來公最賢窮簷小民蒙見憐舉手加額每祝大願公  
居家年百千翰林從子今儒僊竹林南望歸無緣我為封詩到  
壽筵和我妙句篇須全勿令邠老美獨專

讀蘇集有除夜詩首四句云行年三十九勞生已強半

歲莫日斜時還為昔人歎蓋述白太傅語也後蘇公年

止六十五而白公七十六子今年六十九適介其間因

自賦以寄鄙懷

歲暮日斜三十九更加三十又何如勞生強半蘇終少視古猶



稀白有餘學士仍兼慚老學書生未敢望尚書平生却恨張師  
德能保虛名不是渠

次韻友人海昌對月見懷

懷僊不信有瀛洲汗漫真爲此夜游浮世縱觀俱是海高人獨  
立最宜秋髮晞清露如新沐手挽銀河欲倒流却向君家誇故  
事羽衣明月倚黃樓

寄壽趙完璞八十時得人治盲目復明手書示報

憂世非私百畝田上書當道憶當年高歌行野仍三樂妙術傳  
家是十全玉璞獨完雙足在金劒輕刮兩瞳懸年開九袞休言  
老手蹟封題尚宛然

新麪歎

憶昨城西路歸來背夕熏芄芄麥未割極目盡黃雲黃雲方滿  
郊都無一日別如何盤盂中忽復堆白雪乃知昨所見總是豪  
家莊多多謀一飽豈似野人忙年老重食新感歎繼以泣何不  
遲數朝垂芒滿珠粒

登廣福寺佛閣望西山

城中過坊口時見山一面車塵半空起忽復不可見今日出城  
西初喜見山便恨當長夏時艸木更葱蒨透胸如執圭隱首或  
側弁行行七里餘勝地得僧院仰瞻何突兀傑閣俯高殿百級  
躡層梯身向西闌轉橫絕曠野中蒼翠爭自銜已將日力窮却  
任脛骨顫群山不知名起伏端可辨勢從西南來遙向西北旋  
萬馬如馳逐陣列如磨戰白雲與碧靄巖姿陡然變誰倩丹青  
人爲我展畫卷老至客京華宦游真已倦若使入山行所歷豈  
能徧一覽青可了無如此中善



次韻謝鳴治初入館修史纂之作

儒官職業敢終辭猶幸相從得故知

聖學仰承慚薄識史

編旁考惑多岐極知古事能為鑑甘比

工但築基四庫大開

還自喜老來纔免借書癡

中秋夜與葉翁飲

天淨真如海不波依稀倒影見山河却嫌群木交加甚只恐浮雲點綴多此夜浙江潮洶湧去年燕地雨滂沱一樽更與鄰翁飲老至佳辰肯放過

感范魏公食粥事

長白山中熬粥冷丹陽道上麥舟空故人他日能施惠君子當時已固窮

翰林新修工畢適奉命教庶吉士坐久偶成

仰見沉沉畫棟連坐當華屋是何緣朝廷正用儲賢士山澤安能置列僊水激長隄聲若瀉日臨高樹影初圓自憐老眼渾無見亦愛新涼對簡編

題米南宮水墨圖

閔尚書藏

雲山煙樹總模糊此是南宮鵲突圖自笑頂門無慧眼臨窗墨蹟澹如無米自跋云非具頂門上慧眼者不足以識

寄壽施煥伯七十

幼從鄉校託交游束髮相看到白頭我愧濟南非伏勝人言吳下有施讎高懷已見開三徑遺愛猶聞在兩州少待登堂成一笑手持春酒獻還酬

斫蟹

斫蟹曾有人斫蟹始自子蟹也我所欲所欲寧舍魚南人無不



食水族到蟪蛄風味覺斯下至美當輸渠今歲美且賤不待霜  
降初鼎烹本何罪連收同族誅我老齒將落兩螯柰偏腴手持  
但垂涎頗亦晉人如薑醢既登案聊間以嘉蔬一斫即可斷大  
嚼已無餘所恨性不飲右手猶自虛晉人定相笑醒然一何愚  
口腹為小體養之愧軻書惟應知味者或取斯言歟

匏翁家藏集卷第二十九

匏翁家藏集卷第三十

詩四十九首

詠春雪

燕山春已半寒氣逼窗紗亂撒紛無際平鋪淨少瑕繞簷惟作  
片綴袖不成花紅綻妨桃蕊青抽厄艸芽水中仍滅沒空裏恣  
交加向日痕初薄因風勢復斜危牆應便壓平地總無窪

寒夜懷楊應寧

西望關西更向西度關人去定聞雞即看萬馬如雲錦浪比孤  
鴻踏雪泥群牧循行頻檢括連章馳奏自封題山城夜坐銷官  
燭想見霜寒咽鼓鼙

簡鳴治

北望高城樹半遮遙憐孤榻臥官衙新年不見詩循例長夜惟



知夢到家世道豐亨爭自喜宦途疲憊獨堪嗟乞身須約同歸  
去七十于今我亦加

齋居謝屠元勳送解家香

坐來齋閣欲清心忽對名香到夜深已似古人頻掃地更無俗  
客共鳴琴煖煙盤曲絲縈碧細屑圓成著削金始信解家真得  
法清泉餠莫送詞林

與廷式飲時器宅為會十二月十一日

東街晴雪映朝裾早赴公席不虛有約只教三友共重來未  
及一年餘清談盡日卮言出列坐中堂曷足如準擬百篇成別  
錄新春良會不勝書時廷式新刻同年三友會錄

再會子家次廷式韻十七日

休將修禊比山陰一笑荒園欲墮簪量淺不為河朔飲曲高難

和郢中吟疎林夾戶鷓巢小殘雪當階鶴蹟深入夜不須教繼  
燭吾家海月正浮金

三會廷式公館次時器韻二十三日

易水東行踏雪埃依然公館向陽開人歌孝友侯誰在堂比清  
虛我復來飲酒不勞三爵戒賦詩真見百篇才天門半掩歸途  
晚疑是詞林儼直回

齋居答廷式甲子正月五日

手拆詩函翰墨香持來知自聚奎堂詩壇未覺三人少燈假重  
期十日長微雪點階添曉色條風入戶動春光齋居更喜移居  
近古樹南邊隔一牆

又喜廷式夜訪

齋居滿座散茶香忽枉肩輿到小堂公事強畱三日久清談能



爲一宵長烏金屢執銷寒氣紅蠟頻燒避月光却愛兩郎常侍  
教書聲隱隱過南牆

正月九日再答廷式

齋居解帶坐焚香又見題詩寄艸堂只尺地連人獨遠尋常春  
近日初長詔嚴北闕聞 天語禮盛南郊振夜光誰念  
復命老來猶自走循牆

送胡副使擢廣東

衣繡煌煌映赤墀身依霄漢立多時出巡每愛咨民疾遷擢仍  
看荷寵私闕下三年須奏績嶺南一道重分司遙遙祖德仍相  
繼此日清名亦畏知

次韻屠元勳李若虛齋居聯句見寄

西署遙瞻每繫心託交常想歲華深安能乘興還移棹豈爲知

音是鼓琴老去文場慚曳白春來詩櫝喜分金漢家大祀看成  
禮更擬高才賦上林

送王編修九思歸省

九思字汝夫陝右鄠縣人父母具慶祖母亦存

陂種樹久成村況話終南正對門附郭有山兼有水上堂爲  
子更爲孫詞林秀發膺清秩春日舒長獻壽尊兩母白頭誰不  
戀邇來須用答君恩

讀陸參政文量歸田稿

陳塘宿艸徧新塋別集年來又刻成鳳鳥自憐毛羽好孤栖終  
有不平鳴

偶讀司馬溫公詩集有和邵堯夫年老逢春三首各以

本題四字起句有感于中輒倣而和之

年老逢春人共哈小園日涉去仍回牆邊槐樹是誰種籬外桃



花特地開冰到泮時終在沼石依陰處自生苔折腰最苦無筋力欲和淵明歸去來

年老逢春人更狂不登高阜即平岡忘懷每怪言非淺好睡還驚夢不長過市塵多如觸霧臨窗花少勝焚香長將短髮清晨理又聽鍾聲謁未央

年老逢春人自驚春寒不飲負良朋江南報到猶深雪都下聽來無早鶯司馬慣將筇杖策堯夫來挽小車行詩成却怪昌黎語凡物鳴因不得平

温公游園常策筇杖

牡丹初開爽與張幕以護作詩示之

春深喜見一枝紅翠幕高張日正中為語兩郎須記取愛身當與愛花同

送劉仁仲歸省

每愛西川王一雙獨承恩旨到鄉邦長途未畏連雲棧勝地終誇濯錦江舊喜文塲先入彀近看史筆已如扛郾筒春酒秋初熟隔座生香透碧窗

送劉司直展墓

石城挾冊看翱翔好學如君尚未忘譜上劉歆應別派詩中阮是同鄉還乘驛傳從恩召每見經幃進講章識慕亦知崇似許莫瞻河水歎洋洋

夏夜起坐

病首稜稜臥未便坐臨風露小堂前娟娟缺月初離海隱隱明河欲旦天憂早有詩歌倬彼還家無計歎茫然夜深童子垂頭處獨聽城樓刻漏傳

為馬彥中道士題夏太卿雨竹



太卿已逝墨君存筆法依然帶雨痕不識南陽鍊師面百年遺物屬諸孫

次韻答鳴治病中寫懷

扶杖孱然望北宸暑風終日自揚塵地連黃閣翻憂遠疏入銀臺自覺頻身計欲還似王言不斷莫如綸白頭相對應相笑滋味真同苦與辛

次韻屠元勳以二世誥詞刻石樹先塋之作二首有引

伐石南山壓厚坤誥詞考德為求源秦川舊姓真堪數浙水清門久自存城裏白雲凝遠望林間春雨沐重恩百年積德終當發試看秋臺有孝孫右祖塋

合德無勞衆口評兩篇天語最分明秋臺此日生無憾巖壑多年死亦榮湖水流清環隧道鄂山分翠遶羅城穹碑屹立高

如許長表人間罔極情

送文侍御宗嚴奉使河南

盡說文家好弟兄更誇仲氏繡衣明憲臺此日官為重軍政多年例已成花下莫辭清酒薄津頭遙望畫舫輕從來練達民間事不負朝廷是此行

為奎姪題畫

林下茹亭坐此翁旋移詩景入胸中江湖日暮多風浪應咲張帆使順風

聞趙栗夫擢廣東按察使

嗟我頽衰正乞歸喜君新命出彤闈吳江一水能移棹越地千山好振衣學政已成心亦倦獄詞重判手如飛却思二十年前事轉覺詩筵座上稀



乞歸不遂

時第三疏以旱災避位為詞  
蒙 御批勉起供職等語

銀臺投疏列三回批答頻驚 御筆來過料殘生蒙 帝力誤

居高位召天災老身況復加多病 明主何曾棄不才 恩旨

下臨當勉起就令供職已衰頹

五月十五日蒙 賜鮒魚二尾

病臥書窗越幾旬朝來猶自食時新江東到此如論價須抵盤

中二尺銀

盆池養魚

雨來水面似跳珠幸免 魚得共濡只尺洋洋猶自樂不知盆

外有江湖

病中

勉起難將職再供菴居長夏稱疎慵聊從消遣千行帖全仗扶

持八尺筇天上雨來蘇病骨溪頭水長滯行蹤夜涼忽作江南

夢聚塢靈巖紫翠重

為顧良弼題墨梅

芳名曾向譜中傳似見臨溪影倒懸為語游人休亂折低枝正

與雪霜便

次韻李世賢遣祀天壽山禱雨有應二首

禱祠初命禮曹臣百里將誠易感神周雅累章歌太甚漢雲成

隊舞何頻四郊有地無乾土三日為霖絕點塵見說陰晴纔倏

忽下山猶自月華新

北瞻高嶺覆青盆雲起橋山勢獨尊岱嶽乾封非漢事桑林重

禱有湯孫鮒浮洞徹行千里馬去蹄踪散萬村清曉朝衣沾濕

處喜承 天寵出金門



次韻世賢和供字韻之作約顧良弼携酒來慰

久擬盤餐為客供病中百事歎俱慵髮稀自落如枯葉病骨難  
支抵瘦筇老者安居猶費力諸公健步敢追蹤黃花酒熟須邀  
飲佳節遙期九日重

病後獨游園中

八尺筇枝在手中小園游處擬溫公離奇不合翻多壽偃僂安  
能更直躬足弱敢臨堦石亂眼昏渾覺花空綠陰滿地聞啼  
鳥此樂何如與眾同

為屠元勳題畫二首

百頃平湖望若空游人如在水晶宮日長對此消炎暑高閣安  
能着病翁右湖亭高士圖

白頭三鳥共稱翁竝立高枝總下風何物世間為俗人猶

自羨三公右一雀三公圖

世賢以予拒客次前韻復和答之

自憐杯酒不能供老病多緣見客慵開戶出迎難倒屣上堂酬  
拜定携筇預期空挹雲間影逕造須畱竹下蹤莫信黃花時節  
好小園須稱綠陰重

謝顧良弼李世賢携酒過訪五月晦

初伏將臨日正長肩輿同約到茅堂遠林忽辱來公子老杜夏  
見訪詩遠林暑氣  
薄公子過我游小圃翻能致辟疆吳中有顧辟疆  
園王獻之徑造花下扶筇  
臨亂石藤陰移席避斜陽幽居無物相延欸綠樹成行晚更涼

世賢謝送鶴雛次韻答之

短頸宛延類鷺形忍看抱送出前庭詩筒相謝須千首園扁曾  
題只兩翎月下長鳴聲未亮樹間低舞足猶傳南宮見說多僊



侶莫遣群飛入杳冥

再答世賢過訪之作

病臥空園兩月長何曾延客一升堂忽看棗實真成果亂插榆  
秧已作彊自喜清陰消伏暑誰期佳節到重陽酒酣碧碗深如  
許不厭冰漿沁齒涼

謝顧良弼送甘州枸杞

畦間此種看來無綠葉尖長也自殊似取珊瑚沉鍊網空將意  
茲作明珠菊苗同摘憑誰賦藥品兼收正爾須曾是老人宜服  
食只今衰病莫如吾

為世賢題唐子華釣舟圖

日落長堤古樹陰漁舟爭放碧溪潯看渠共理絲綸手真有前  
人竭澤心

韓貫道為陳太僕題滁州環山樓末聯有游人莫作尋  
常看季子文章在上頭之句以予嘗作樓記也因貫道  
寄示次韻亦賦一首

山過淮西此地優元龍豪氣正登樓松濤繞壑聲如瀉石竇生  
雲勢欲浮庶子泉清仍弔古判官花好不知秋馮欄遠瞰孤亭  
小更有文章在下頭

題趙仲穆馬圖 李世賢藏

王孫畫馬兼畫人 神全色不均一人汲水來飲馬一馬欲  
飲將騰身二馬俯首嚙芻藁一人按榭睨櫪阜天閑不待秋高  
肥一馬不渴二馬飽朔方用兵萬騎馳三馬竝立如不知

贈謝鳴鑾還台州次李若虛韻二首 鳴治之弟

海上三年別故山客中骨肉眼前看行裝自解書千卷臥榻聊



分屋半間晉代詩才推謝朓嚴陵風節見方干  
脩然不為冠裳累悔不從君舊學閒

京國看作宦游從來試未曾投家庭行義存三代隱逸聲  
名出九流舊節懸車應不改上庠分袂豈無由幸逢堯舜  
巢父依然去飲牛

五同會

日高連步出金閨鄉里衣冠比聚奎已幸容予為五一不勞邀  
客向東西古人事例直率流俗杯盤整齊白髮蕭然叻坐  
首敢辭揮筆製新題

西涯示東克紀游諸作有謁顏廟一首予昔謁廟未有  
詩因次韻補之

魯人有東家顏氏非西鄰陋巷帶簪井千載猶荒村古屋自增

光累代加褒甄繼昔心不違至今里稱仁賢哉克復語後生庶  
前聞豈知簞瓢樂樂道非樂貧我昔過其里指途藉居人是時  
屬炎暑蕭索如初春老樹盡摧折周垣半頽埋入祠重瞻拜辨  
香贊明神終退見者疑為原憲孫泗水清滉漾尼山翠嶙峋  
落日無以薦悠然歌采蘋

詩餘三十四首

詠墨菊

醜奴兒

風枝露葉涼思起占斷東籬愛殺開時只恨王弘送酒遲  
綠衣黃裏詩人句不是相知顏色堪疑新浴羲之洗研池

詠木芙蓉

滿江紅

桃李無言悵久與青春相別誰料到秋深依舊紅芳未歇亂  
葩偏承白露滋柔枝肯被涼風折望耶溪有種二名同真比竊



桂枝香菊花節月中僊霜下傑試移來向老圃為同列寶鬢偏  
非墜馬粧綠裙低為凌波揭歎知心惟有一高蟾詩題絕

詠桂花

浪淘沙

節候屬金行花信堪憑鳳釵亂插綴黃英驀地涼風吹落地猶  
作金聲 浴下未知名合喚花卿天香不與衆芳爭何事芙蓉  
遙避去野水盈盈

秋夜對月

大江東去

危樓百尺隱秋蟾微露半規簷角吹滅銀燈聊坐待自捲西堂  
簾幙積雨初收纖雲不起訝星河俱落屋梁光滿赴人如有盟  
約 何事李白題詩強分今古有酒宜高酌慢撫枯桐三三引  
寫我一時之樂古樹風回荒塔蛩語未覺秋聲惡芙蓉花上  
夜露華堪濯

翰林齋宿對雪

滿庭芳

官燭全銷朝衣未着簌簌誰打西窗春威猶弱滕六尚難降信  
是春前少見燕市上也復嗥尤庭槐白一時點綴冰柱倩誰扛  
齋居當此夜香凝紙帳酒涸銀缸馬蹄散空畱玉斗成雙郢  
曲無人傳得詞苑客宜製新腔爭如唱柳州佳句簑笠釣寒江

又和李后城

南鄉子

深院上衣飄誰把風前玉樹搖起望街頭人獨去迢迢足蹟分  
明過石橋 近午恨還銷平滿階除待此宵惡客猶嫌無酒飲  
寥寥明日東家折簡招

賀張東海太守致仕

定風波

庾嶺寒梅千樹開南安太守賦歸來向晚春風狂捲地只有梅  
花一笑不吾猜 拂袖高臺亦快哉風月相隨直到九峯隈遙



計到時春已暮白髮蒼顏醉也不曾頹酒冽魚肥料得要人陪

答傅體齋約游西山 青玉案

西山於我如無分要游時春常盡在在京華凡六閨出城偏近  
山僧笑我此事無人信 故人書札勞相問可惜情懷還不順  
冒暑同游游也悶湖堤須待杏花疎雨吹濕雙吟髻

玉延亭午坐 如夢令

午枕莫教重睡亭上老槐垂翠暑氣此間消一陣好風隨至多  
事多事又過菜畦行水

壽費葯軒干廷言兄正月四日生辰 臨江僊

此日葯翁開七袞人來併賀新年逢恩堂裏鼓填然改元聞好  
語紀事作長編 江上扁舟初到也憑將玉季書傳買田抽取  
俸中錢它年如得請一笑兩華顛

和答李世賢慶五十 風入松

一從身作翰林官氣味便酸寒圖書堆裏匆匆過功名晚青鏡  
羞看無事不修年譜有時還上詩壇 卯君逢卯歲將殘五指  
屈來完往年難比今年好圍爐處妻子團樂新歲行人欲發家  
書光報平安

又答王濟之 水龍吟

短籬重過詩筒生朝引起東鄰興厭歌舊調恭承新約年年來  
慶酌則鄉人不似軻書斯須之敬愧雲路先驅老婦當時學舞  
柘枝腰硬如今細數行年若流水吾心不競多謝纍纍珠玉客  
郎將何回贈賴菴居一物堪分月兒端正期生子攀月裏最高  
枝吾言非佞

又答陳玉汝 滿庭芳



三十年前以文爲戲把筆曾咎長鬚有繩難繫西日漸桑榆堪  
歎鬚都白了兼撚斷悵悴非吾今猶健他年見客回拜要人扶  
朝來無限恨白雲零落春草荒蕪傷情處錦裯當日呱呱富  
貴非吾願也松菊畔能保遺軀吳門去扁舟蕩漾時復過陳湖

又答周原已

沁園春

蠟炬銷銀夜誦新詞美成再來覺癡年漸長後生可畏秋藤垂  
雨春筍驚雷傳菊堂中夢梅室裏兩處尋常幾往回願他日竝  
舟射瀆接履胥臺 命宮浪把韓蘇比磨 蝸於人安取哉想共  
瞻山斗何其重望如開武庫是甚高才雪擁藍關風清赤壁落  
得平生衆手推但持酒信人生萬事有命安排

又答孫希說

千秋歲

殘年奇事試看門如市怪壽旦人能記藏  
鈞今夜樂飲酒全家

醉春又至銀幡插髻隨兒戲 有問吾年紀逢五初辭四杜老  
句坡僊字雕虫空自苦畫虎難相類始知得遽公往事真堪愧

又答朱天昭

賀新郎

分袂嗟何久天一方望美人兮吳趨坊只今日喜重逢燕地不  
見雪花如雪正殘冬晴明時候賤子行年剛半百征車來帶得  
閭門酒歌一闕酌三斗 況君本出睢陽後便如五老來吾壽  
更把筵中詞客數又合着香山九眼底事大都非偶春半報君  
惟兩語喚小僮急向西樓走金榜首題朱某

又答趙栗夫

醉蓬萊

歎平生事業秃筆成堆殘書盈架九載心勞擬陽城書下氣力  
無多頭顱如許向老來誰怕瞻望西山經營東圃頻年無暇  
疋馬何來白雲司裏語妙非詩意濃如畫世俗相過笑稱觴持



把豈待楓落吳江一句為鄉閭增價免管停豪鳳箋留尾試題  
除夜

又答賀其厚

喜遷鶯

蓬門朝啓笑委巷荒涼誰施朱榮京國繁華貧居幽僻村塢依  
然堪抵却有二間破屋能作故人客邸稱壽處吾見其兄若逢  
其弟好禮為我再解金龜當槽坊新醴狂客如君謫僊非我  
何事將罇俎洗且復呵開凍硯親手探詞源底歲既暮肯謝盧  
家茶乞顏公米

又答楊君謙二首

大江東去

早年踈懶豈知得到中歲重心猶在五十無聞我預向論語篇  
中高載破研冰堅空壘塵滿此是家常態寒窗孤坐悠然徒有  
深慨何事車馬喧闐入門來總是親朋察案執雉持魚薦首

醅況有堆盤生菜舉盞相酬適臘盡春回羲和交代老夫衰矣  
惟君宜自加愛

曲高難和問誰倡此白雪陽春新調須是宗人纔識得曹氏碑  
文之妙蒲柳姿零牛羊齒長得此真堪笑才如甕蠶一時繰出  
成繚老手親付新郎作長綸便向六鰲垂釣波及鯨魚驚昨  
宵地下髮場尾掉是夜地震病眼摩挲看春榜題名靈龜休焦  
嘗聞人語科場最怕羊少

苦雨

浣溪沙

幾陣南風挾雨飄霎時窗外過春潮端愁西郭衆山漂翠繞  
玉河牽荇菜綠搖金水舞蘭荳田中宿麥愁無苗

喜晴

同前

晚來疎雨過柴關還我斜陽屋滿間東方蟬竦一何彎把筆



欲題山宛轉枕書高臥鳥綿蠻意隨天上白雲閒

追和元張伯淳學士贈長蘆彈琵琶者

木蘭花慢

自潯陽客散千古事少風情忽丹穴將雛空山啄木上下和鳴  
誰云不如竹也却千愁萬恨託絲聲好把金龜當酒莫將銀甲  
彈箏 玉堂風靜落花輕學士舊曾聽想淚濕青衫情纏綵筆  
沉醉初醒長蘆往時年少悵悠然對坐到大明空使後人懷古  
夜窗快雪時晴

游虎丘

江神子

千人石上可中亭僧說法鬼來聽此事休談但愛石峻嶒二十  
餘年身再到頭已白樹猶青 劔池一道更清冷第三名載泉  
經斜陽啼鳥酒初醒小閣半間重徙倚蘇子語是詩銘

謝吳中親友

清平樂

金昌亭下舟泊當春夜水底星光許大風利帆開似馬曉  
來送客忙追不知人在天涯莫謂裝裳宵遁怕當人面分離

舟中訊沙燕

憶王孫

身輕不受柳風吹小穴藏身託土隄隄若崩時穴更移免啣泥  
誰說華堂便好棲

臨清晚泊

柳梢青

畫鷁高飛長河作帶細柳成帷晚睡初醒棹歌聲起錯認南歸  
清源城郭旁圍望道上行入未稀油壁香車紅泥細酒故土  
全非

晚行御河

西江月

隱隱高原若柳茫茫古岸黃沙小舟不見賣魚蝦有酒何曾論  
價 水學空谷腸九曲路迷人蹟三义灘頭茅屋兩三家此景畫



師休畫

公望夏晚

蝶戀花

落葉滿階吹不去上苑啞啞只有烏爭樹吏散堂空人靜處風  
景嗟如許時事驚心那忍賦白髮垂垂總是愁千縷日隱西  
山當薄暮扁舟好問江湖路

題脩竹士女圖

阮郎歸

嫣然何物步苔茵霞裾誰染塵淡粧一面認來真水邊非麗人  
如抱恨更含顰隔園脩竹接東鄰風前忙轉身

題倦繡士女圖

同前

日高碧樹午陰圓繡牀人未眠回文錦字綵絲纏停鍼還悵然  
飛絮底落花邊青春將暮天遼陽人去幾時還真將詩意傳

題宮人二景二首

重疊金

太湖石畔苔痕滑玉階扶上看明月若比廣寒宮宮中人又空  
夜寒風力重別館簾鉤動為問夜如何松陰月正多

離宮複道遙相望步來不設青絲障琪樹列千行更聞金粟香  
玉奴傳信至上有飛瓊字明日會蓬萊還同僊姥來

癸亥歲除自壽

踏莎行

一歲之終吾生之始年稱七字從今起俗說添年是減年不添  
不減那能此天念踈慵人憐委靡詞林老大成何事若教歸  
去更安閒不知活到多年紀







卷之四